



晦庵先生朱文公文集卷之五

詩

拜張魏公墓下



衡山何巍巍湘流亦湯湯我公獨何往劍履在此堂念昔
中興初孽豎倒冠裳公時首建義自此扶三綱精忠貫宸
極孤憤摩穹蒼元戎二十萬一旦先啟行西征奠梁益南
轅撫江湘士心旣豫附國威亦張皇縞素哭新宮哀聲連
萬方黠虜聞褫魄經營久徬徨王帛驟往來士馬且伏藏
公謀遠不用拱手遷南荒白首復來歸髮短丹心長拳拳
冀感格汲汲勤修攘天命竟難謀人事亦靡常悠然謝台
鼎騎龍白雲鄉坐令此空山名與日月彰千秋定軍壘岌
業遙相望賤子來歲陰烈風振高岡下馬九頓首撫膺淚

淋浪山顏今幾年志士日慘傷中原尚腥羶人類幾豺狼
公還浩無期嗣德煒有光恭惟宋社稷永永垂無疆

敬簡堂分韻得月字

煌煌定方中農隙孟冬月君侯敞齋扉華榜新未揭我來
適茲時亦有大夫芟清觴不留行晤語得超越更看雷雨
勢翻動龍蛇窟襟懷頓能輸肝膽亦已竭老仙來何方湖
海氣硯砢君侯歛袂起顛越承履襪坐人驚創見引去殊
卒卒伊余不忍逝頓首願有謁人生均秉彛天造豈停歇
云何利害判所較無一髮茲焉辨不早大本將恐蹙吾言
實自箴君聽未宜忽

登嶽麓赫曦臺聯句

乾道丁亥
冬九日

泛舟長沙渚振策湘山岑

晦翁

煙雲眇變化宇宙窮高深

懷古壯士志憂時君子心

敬夫

寄言塵中客莽蒼誰能尋

晦翁

登定王臺

寂寞番君後光華帝子來千年餘故國萬事只空臺日月
東西見湖山表裏開從知爽鳩樂莫作雍門哀

次敬夫登定王臺韻

今朝風日好抱病起登臺山色愁無盡江波去不回客懷
元老草節物又踈梅且莫催歸騎憑欄更一杯

七日發嶽麓道中尋梅不獲至十日遇雪作此

此後係南
嶽唱酬

三日山行風繞林天寒歲暮客愁深心期已悞梅花笑急
雪無端更滿襟

大雪馬上次敬夫韻

仙人喬嶽頂散髮吹參差喚我二三友集此西南垂列筵
命洛公侑坐迎江妃導之千羽旄投以萬璧璣繽紛一何
麗掩靄難具知衆真亦來翔恍覺叢霄低茫茫雲霧合一
一瓊瑤姿回首謝世人千載空相思吾衰怯雄觀未敢探
此竒短衣一匹馬幸甚得所隨天寒飲我酒酒罷賡君詩
人生易南北復此知何時

風雪未已決策登山用敬夫春風樓韻

披風蘭臺宮看雨百常觀安知此山雲對面隔霄漢群陰
匝寰區密雪渺天畔峩峩雪中山心眼悽欲斷吾人愛竒
賞遞發臨河嘆我知沍寒極見睨今當泮不須疑吾言第
請視明日蠟屐得鴈行籃輿或魚貫

十三日晨起霜晴前言果驗再用敬夫定王臺韻

賦詩

北渚無新夢南山有舊臺端能成獨往未肯遽空回磴滑
新經雪林深不見梅急須乘霽色何必散銀杯

敬夫用熹定王臺韻賦詩因復次韻

新詩通造化催出火輪來雲物低南極江山接漢臺心期
千古迥懷抱一生開回首狂馳子紛紛政可哀

馬上口占次敬夫韻

幾日城中歌酒昏今朝匹馬向烟村迎人况有南山色勝
處何妨倒一尊

馬上舉韓退之話口占

昨日風煙接混茫今朝紫翠插蒼蒼此心元自通天地可

笑靈宮枉炷香

雪消溪漲山色尤可喜口占

頭上瓊岡出舊青馬邊流水漲寒汀若爲留得晶熒住突兀長看素錦屏

馬跡橋

下馬驅車過野橋橋西一路上雲霄我來自自有平生志不用移文遠見招

登山有作次敬夫韻

晚峯雲散碧千尋落日衝飈霜氣深霽色登臨寒夜月行藏只此驗天心

方廣道中半嶺小憇次敬夫韻

不用洪崖遠拍肩相將一笑俯寒烟向來活計蓬蒿底浪

說江湖極目天

道中景物甚勝吟賞不暇敬夫有詩因次其韻

穿林踏雪覓鍾聲景物逢迎步步新隨處留情隨處樂未妨聊作苦吟人

崖邊積雪取食甚清次敬夫韻

落葉疎林射日光誰分殘雪許同嘗平生願學程夫子恍憶當年洗俗腸

後洞山口晚賦

日落千林外烟飛紫翠深寒泉添壑底積雪尚崖陰景要吾人共詩留永夜吟從教廣長舌莫盡此時心

後洞雪壓竹枝橫道

石灘聯騎雪垂垂已把南山入小詩後洞今朝逢折竹却

思聯騎石灘時

方廣奉懷定叟

偶來石廩峰頭寺，忽憶畫船齋裏人。城市山林雖一致，不知何處是眞身。

方廣聖燈次敬夫韻

神燈照夜惟聞說，皓月當空不用尋。箇裏忘言眞所得，便應從此正人心。

羅漢果次敬夫韻

自勞足倦登喬嶽，吻燥腸枯到上方。從遣山僧煮羅漢，未妨分我一盃湯。

壁間古畫精絕未聞有賞音者

老木樛枝入太陰，蒼崖寒水斷追尋。千年粉壁塵埃底，誰

識良工獨苦心

方廣版屋

秀木千章倒層甍，萬瓦差梢無人似。玉空詠小戎詩

泉聲次林擇之韻

空巖寒水自悲吟，遙夜何人爲賞音。此日團欒都聽得，他時離索試追尋。

霜月次擇之韻

蓮花峰頂雪晴天，虛閣霜清絕縷烟。明發定知花藪藪，如今且看竹娟娟。

枯木次擇之韻

百年蟠木老聱牙，偃蹇春風不肯花。人道心情頑似汝，不須持向我儂誇。

夜宿方廣聞長老守榮化去敬夫感而賦詩因次
其韻

拈椎豎拂事非真用力端須日日新只麼虛空打筋斗思
君辜負百年身

蓮花峰次敬夫韻

月曉風清墮白蓮世間無物敢爭妍如何今夜峯頭雪擦
得新詩續舊篇

奉題張敬夫春風樓

乾道丁亥冬至

隆堂謹前規傑閣聳竒觀憑欄俯江山極目眇雲漢主人
沂上翁顧肯吟澤畔俛仰一喟然冲融無間斷我來抑何
幸屢此承晤歎平生滯吝曾若若層冰泮繼今兩切切保
合勤旦旦萬事儘紛綸吾道一以貫

方廣睡覺次敬夫韻

風簷雪屋澹無情巧作寒窓靜夜聲倦枕覺來聽不斷相
看渾欲不勝清

感尚子平事

翩然遠嶽恣遊行慨想當年尚子平我亦近來知損益只
將懲窒度餘生

殘雪未消次擇之韻

脚底悲風舞凍鴉此行真是躡蒼霞仰頭若木敷瓊蕊不
是人間玉樹花

自方廣過高臺次敬夫韻

素雪留清壁蒼霞對赤城我來陰壑晚人說夜燈明貝葉
無新得蒲人有舊盟咄哉寧負汝安敢負吾生

清疑當作青

朱子大全 卷之五 石廩峰次敬夫韻

七十二峰都插天一峰石廩舊名傳家家有廩高如許大
好人間快活年

行林間幾三十里寒甚道傍有殘火温酒舉白方
覺有暖意次敬夫韻

千林一路雪毡堆吟斷饑腸第幾回温酒正思敲石火偶
逢寒燼得傾杯

林間殘雪時落鏘然有聲

青鞋布襪踏瓊瑤十里晴林未覺遙忽復空枝墮殘雪恍
疑鳴璫落叢霄

至上封用擇之韻

疇昔朱陵洞如今白帝城天高雲共色夜永月同明萬象

爭回巧千峰盡乞盟登臨須我輩更約羨門生

福嚴寺回望嶽市

昨夜相携看霜月今朝誰料起寒烟安知明日千峰頂不
見人間萬里天

福嚴讀張湖南舊詩

樓上低回摻別袖山中磊落見英姿白雲未屬分符客已
有經行到處詩

登祝融峰用擇之韻

今年緣底事浪走太無端直以心期遠非貪眼界寬雲山
於此盡風袂不勝寒孤鳥知人意茫茫去不還

穹林閣讀張湖南七月十五夜詩詠歎久之因次
其韻

南嶽天下鎮祝融最高峰仰干幾千仞俯入一萬重開闢
知何年上有釋梵宮白日照雪屋清霄響霜鏞極知瓌特
觀仙聖情所鍾雲根有隱訣讀罷凌長風

晚霞

日落西南第幾峰斷霞千里抹殘紅上方傑閣凭欄處欲
盡餘暉怯晚風

過高臺携信老詩集夜讀上封方丈次敬夫韻

十年聞說信無言草草相逢又黯然借得新詩連夜讀要
從苦淡識清妍

贈上封諸老

夜宿上封寺翛然塵慮清月明殘雪裏泉溜隔窓聲楮衲
今如許綈袍那復情爐紅虛室暖聊得話平生

自上封登祝融峰絕頂次敬夫韻

衡嶽千仞起祝融一峰高群山畏突兀犇走如曹逃我來
雪月中歷覽快所遭捫天滑青壁俯壑崩銀濤所恨無十
牯一掣了六鼇遄歸青蓮宮坐對白玉毫重閣一徙倚霜
風利如刀平生山水心真作貨食饗明朝更清澈再往豈
憚勞中宵撫世故劇如千蝟毛嬉遊亦何益歲月今滔滔
起望東北雲茫然首空搔

十五日再登祝融用臺字韻

江流圍玉帶天影抱瓊臺柱杖烟霄外中巖日月回箕山
藏遁許吳市隱仙梅一笑今何在相期再舉杯

胡丈廣仲與范伯崇自嶽市來同登絕頂舉酒極
談得聞比日講論之樂

我已中峰住君從何處來莫留巖底寺徑上月邊臺濁酒
團欒坐高談次第開前賢渺安在清酌寄餘哀

醉下祝融峰作

我來萬里駕長風絕壑層雲許盪胃濁酒三杯豪氣發朗
吟飛下祝融峰

十六日下山各賦一篇仍迭和韻

絕頂來還晚寒窓睡達明連床眇歸思三宿悵餘情雲合
山無路風回靈有聲嶽祇珍重意只此是將迎

和敬夫韻

蠟屐風煙隨處別下山人事一番新世間不但山中好今
日方知此意真

和擇之韻

仰止平生舊今年得得來舉頭天一握倚杖雪千堆講道
心如渴哦詩思湧雷出山遺語在歸騎莫徘徊

二詩奉酬敬夫贈言并以爲別

我行二千里訪子南山陰不憂天風寒况憚湘水深辭家
仲秋旦稅駕九月初問此爲何時嚴冬歲云徂勞君步玉
趾送我登南山南山高不極雪深路漫漫泥行復幾程今
夕宿櫛洲明當分背去惆悵不得留誦君贈我詩三歎增
綢繆厚意不敢忘爲君商聲謳

昔我抱冰炭從君識乾坤始知太極蘊要眇難名論謂有
寧有跡謂無復何存惟應酬酢處特達見本根萬化自此
流千聖同茲源曠然遠莫禦惕若初不煩云何學力微未
勝物欲昏涓涓始欲達已被黃流吞豈知一寸膠救此千

夫渾勉哉共無斃此語期相敦

讀林擇之二詩有感

自此後係東歸亂藁

筍輿隨望入寒烟每誦君詩輒黯然今夜定知連榻夢一時飛墮錫山前

竹輿傲兀聽嘔啞合眼歸心已到家遊子上堂慈母笑豈知行李尚天涯

馬上贈林擇之

與君歸思渺悠哉馬上看山首共回認取山中竒絕處他年無事要重來

梅溪陂下作

野牛浮鼻過寒溪落木蒨溲水下陂俗手定應摹不得無人說與范牛知

寄題李東老淵乎齋

東老幽棲地淵乎亦妙哉空山無客到流水有花開句律今誰敵詩仙舊所陪朱絃悄餘韻綺席澹浮埃竟日門多掩長沙歲一來端能負後鶴歸計莫裴徊

宿梅溪胡氏客館觀壁間題詩自警二絕

貪生莖豆不知羞靦面重來躡俊遊莫向清流浣衣袂恐君衣袂浣清流

十年湖海一身輕歸對黎渦却有情世路無如人欲險幾人到此誤平生

擇之所和生字韻語極警切次韻謝之兼呈伯崇

不是譏訶語太輕題詩只要警流情煩君屬和增危惕虎尾春冰寄此生

再答擇之

兢惕如君不自輕世紛何處得關情也應妙敬無窮意雪未消時草已生

十一月二十六日宿萍鄉西三十餘里黃花渡口客舍稍明潔有宋亨伯題詩亦頗不俗因錄而和之

鼎足爐邊坐陶然共一樽道心元自勝世味不須論安穩三更睡清明一氣存雖無康樂句聊爾慰營魂

二十七日過毛山舖壁間題詩者皆言有毛女洞在山絕頂問之驛吏云狐魅所為耳因作此詩人言毛女住青冥散髮吹簫夜夜聲却是郵童解端的向儂說是野狐精

次擇之韻聊紀秦事

不知四海已揚湯舞殿歌臺樂未央五帝威神等牛馬六王子女盡嬪嬙仙心久已攀姑射辨口從教泣華陽行客詎明千古意虛疑霞佩響琳琅

雪梅二闕奉懷敬夫

二闕合次樂府以有後詩仍舊編附此

雲垂幕陰風慘淡天花落天花落千林瓊玖一空鸞鶴征車渺渺穿華薄路迷迷路增離索剡溪山水碧湘樓閣

梅花發寒梢掛著瑤臺月瑤臺月和羨心事履霜時節野橋流水聲嗚咽行人立馬空愁絕空愁絕為誰疑佇為誰攀折

題二闕後自是不復作矣

久惡繁哇混太和云何今日自吟哦世間萬事皆如此兩
葉行將用斧柯

次韻擇之聽話

語道深慙話一場感君親切爲宣揚更將充擴隨鈎索意
味從今積漸長

次韻伯崇自警二首

十載相期事業新云何猶歎未成身流光易失如翻水莫
是因循誤得人

誦君佳句極優柔未得明彊是所憂若悟本來非木石保
君弘毅不能休

奉答擇之四詩意到卽書不及次韻

爲閔人疲上馬行此時消息儘分明更憐跣足無衣苦克

此直教天下平

君看灞橋風雪中南來北去莽何窮想應亦有還家客便
爾譏訶恐未公

東頭不見西頭是南畔唯嫌北畔非多謝聖門傳大學直
將絜矩露天機

安肆真同鴆毒科君言雖苦未傷和解嘲却是生回互政
恐紛紛事轉多

答擇之

長言三復儘溫純妙處知君又日新我亦平生傷褊迫期
君苦口却諄諄

次韻擇之見路傍亂草有感

世間無處不陽春道路何曾困得人若向此中生厭斁不

知何處可安身

到袁州二首

馬蹄今日到袁州山木蕭條四面愁多謝晚來風力勁朔
雲寒日共悠悠

袁州刺史幾何人韓李流芳獨未泯道喪時危今日意九
原遺恨一時新

十二月日袁州道中作

今朝已是臘嘉平我獨胡爲在遠行白髮倚門應注想青
山聯騎若爲情

同林擇之范伯崇歸自湖南袁州道中多奇峰秀
水恠石清泉請人賦一篇

我行宜春野四顧多奇山攢巒不可數峭絕誰能攀上有

青葱木下有清冷灣更憐灣頭石一一神所剗衆目共遺
棄千秋保堅頑我獨抱孤賞喟然起長嘆

賦歸雲洞

人生信多患吾道初不窮云何感慨士伏死嵒巖中宜陽
古道周竅石何嵌空窮幽歷肺腑履坦開房櫳頗疑有畸
人往昔寄此宮歲月詎云幾井竈無遺蹤我來記清秋歸
塗渺窮冬興懷重幽討永嘯回長風風回雲氣歸洞口春
濛濛信美非人境出門吾欲東

人言石乳洪羊之勝不及往遊作此

人道歸雲未足誇洪羊石乳更裕衍連環入夢難紆軫回
首西風又日斜

分宜晚泊江亭望南山之勝絕江往遊將還而舟

朱子大全 卷之五
子不至擇之刺船徑渡呼之予與伯崇佇立以俟
因得二絕

寒水粼粼受晚風輕舸來往思無窮何妨也向溪南去徙
倚空林暮藹中

一棹翩然喚不回兩筇江畔久徘徊早知君有如神技同
下中流亦快哉

新喻西境

北嶺蒼茫雨欲來南山騰躑翠成堆穉杉繞麓千旗卷野
水涵空一鑑開客路情懷元倥傯今晨遊眺却徘徊自然
觸目成佳句雲錦無勞更剪裁

道間厭苦泥淖思亟還家安坐講習用擇之韻呈

二賢友

客路泥塗正所憂可堪雲物更油油向來結友輕千里此
去還家且一丘妙處自應從我得躬行肯使歎吾猶兩賢
定許相提挈厚意何勝雜珮酬

再和油字韻

楚山黃落正離憂喜見寒杉卷碧油倦客今年真白髮羽
人何日定丹丘竒兵捷出吾當避狹路爭先子不猶箇裏
竟能無一語應慙二鳥起相酬

次韻擇之懷張敬夫

往時聯騎向衡山同賦新詩各據鞍此夜相思一杯酒回
頭猶記雪漫漫

別韻賦一篇

踏雪凌霜眼界新舉鞭遙指玉嶙峋回頭此日成千里橫

槩思君少一人

宿新喻驛夜聞風鐸

倦枕欹眠到五更却嫌風鐸又悲鳴恍疑絺綌南鄰夜寒
鐵丁東客夢驚

題野人家

茆簷竹落野人家只麼悠悠閱歲華田父把犁寒雨足牧
兒吹笛晚風斜

題萬安野館

身似孤雲去復還投裝猶記此窓間只應烟雨蒼茫外卽
是當時萬疊山

萬安遇長沙便欲附書不果

長沙一別兩悠悠夢想清湘帶橘洲欲寄行人數行字行

人不作置書郵

不見梅再用來字韻

舊歲將除新歲來梅花長是雪毳堆如何此日三州路不
見寒葩一樹開野水風烟迷慘澹故園霜月想徘徊夜窓
却恐勞幽夢速把新詩取次裁

賦水僊花

隆冬凋百卉江梅厲孤芳如何蓬艾底亦有春風香紛敷
翠羽帔溫艷白玉相黃冠表獨立淡然水僊袞袞植愧蘭
蓀高操摧水霜湘君謝遺楫漢水羞捐璫嗟彼世俗人欲
火焚衷腸徒知慕佳冶詎識懷貞剛淒涼栢舟誓惻愴終
風章卓哉有遺烈千載不可忘

清江道中見梅

今日清江路寒梅第一枝不愁風嫋嫋正柰雪垂垂煖熱
惟須酒平章却要詩他年千里夢誰與寄相思

臨江買舟

征驂聊駐近江樓南市津頭問買舟共說明朝乘雪水長
歌一日到洪州

薊林

東臯濺寒水西崦饒清陰南埭奎壁麗北垞靜且深入門
流綠波竹樹何箭慘積石象雲壑高堂杳沉沉左通雲水
區右徑梅杏林沼沚共回簿觀臺鬱差參紛吾千里遊發
軼南山岑過門得嘉賞慰此夙昔心紆懷企疏翁歲晚投
冠簪婆娑此澗谷俯仰成古今嗣德世有人聞道我所欽
相見無雜語晤言寫曾襟懷舊復惆悵命酒聊同斟飲罷

我當去握手清江潯

冠簪一作華簪

過樟木鎮晚晴二首

朝晴遣我看薊林頃刻浮雲萬里陰拂袖凌風三十里依
然寒日照長吟

飛雲極目疑梅嶺落日回頭夢橘洲從此不愁東路永祗
應西望轉悠悠

赤岡頭望遠山作

曉起清江弄小舟晚風吹過赤岡頭遠峰自作脩眉歛萬
里那知客子愁

次韻擇之發臨江

千里烟波一葉舟三年已是兩經由今宵又過豐城縣依
舊長江直北流

次韻擇之漫成

落日晴江更遠山
遠山猶在有無間
不須極目傷懷抱
且看漁船近往還

船一本作舫

竹節灘

船下清江竹節灘
長烟漠漠水漫漫
人家斷岸斜陽好
客子中流薄暮寒

舟中晚賦

長風一萬里披豁
暮雲空極浦三年
夢扁舟二子同離
離浮遠樹杳杳没
孤鴻若問明朝事
西山晝靄中

次韻擇之將近豐城有作

老矣身如萬斛舟
長風破浪若為收
江山若有逢迎意
到處何妨為少留

過豐城作

渺渺豐城縣回頭
憶舊遊晴江羅遠
樹宿莽亂中洲寶
劍今鱗甲神光尚
斗牛他年還記得
此夜一扁舟

舟中見新月伯崇擇之二友皆已醉卧以此戲之
舟中見新月烟浪不勝寒與問醉眠客豈知行路難
殘陽猶水面孤鴈更雲端蓬底今宵意天邊芳歲闌

次韻擇之舟中有作二首

一江烟水浩漫漫
昨夜扁舟寄此間
共向船頭望南北
不知何處是家山

一席三人抵項眠
心知蓬外水如天
起來却恠天如水
月落烏啼浦樹邊

自東湖至列岫得二小詩

孺子高風何處尋東湖臺觀水雲深生芻一束人如玉此日淒涼萬古心

昨日來時萬里陰長江雪後玉千岑蒼翠不盡登臨意重對晴天豁晚襟

列岫望西山最正殆無毫髮遺恨滕王秋屏皆不及也因作此詩二首

城中望西山拄頰空朝暮不到列岫亭詎知親切處東西水平分南北山中判妙處毫髮間商略無遺筭

晚飲列岫

危亭披豁對蒼霞策杖重來日未斜滿目江山一尊酒哦詩莫遣太雄誇

觀上藍賢老所藏張魏公手帖次王嘉叟韻

火風吹散旱天雲膚寸空餘翰墨新拭淚相看渺今古堂堂那復有斯人

次韻伯崇登滕王閣感舊蓋聞往時延閣公拜疏於此云

金闕銀臺夢想中樓前拜舞早囊空十年殄瘁無窮恨歎息今人少古風

觀西山懷嶽麓以爲莫能相上下也聊賦此云風月平生意江湖自在身年華供轉徙眼界得清新試問西山雨何如湘水春悠然一長嘯妙絕兩無倫

進賢道中

往辭湘水曲今過豫章城改歲無多日到家才幾程晝憐春意迫夜喜月華清此去無淹軌前途似掌平

野望

登高立馬瞰晴川
四面平林接暝烟
東望不堪頻極目
歸心已度鳥飛前

次韻擇之進賢道中漫成五首

白酒頻斟當啜茶
何妨一醉野人家
據鞍又向岡頭望
落日天風鴈字斜

笑指斜陽天外山
無端長作翠眉攢
豈知男子桑蓬志
萬里東西不作難

夜宿林岡月滿川
歸期屈指正茫然
也知地脉無羸縮
只把陰晴更問天

誰作窓間擁鼻聲
更哦樂府短歌行
從教永夜清無寐
只恐晨鷄不肯鳴

且喜重岡上人勞
馬亦飢不妨隨野雀
容易宿寒枝

次韻擇之夜宿進賢客舍

白日照寒野
緜然千里平
馳暉一以沒
浩蕩驚飈生
露彩林表見
月華波上明
同行魯狂士
忽發商歌聲
洗耳金石奏
信知塵累輕

次韻擇之潤陂有作

我行欲安適
莽莽窮山陂
晨裝遠林表
午憇通川湄
曠望想慈親
行役嗟吾兒
喟然陟屺歎
歸心浩無涯
曉霜徒御寒
莫雨朋儔悲
前期諒非遠
無爲苦愁思

過潤陂日晴意可喜
至暮復雨伯崇有詩因次其

韻

客裏歲云暮
我心殊未平
悠悠惜往日
鬱鬱懷平生
况復

久陰雨喜茲霜曉明那知不終日又作瀟瀟聲坐厭泥塗辱空嗟鴻鴈輕

山行兩日至金步復見平川行夷路計程七日可到家矣

行穿側徑度荒山又踏深泥過野田路轉忽然開遠望眼明復此見平川江烟浦樹悲重疊楚水閩山喜接連稅駕有期心轉迫稜稜瘦馬不勝鞭

次韻擇之金步喜見大江有作

江頭四望遠峰稠江水中間自在流並岸東行三百里水源窮處卽吾州

此江發源分水嶺故前詩有楚水閩山喜接連之句

次韻擇之餘于道中

寒盡春生草又青化工消息幾曾停因君一詠陵陂麥枕

憶儂家老圃亭

亭下予家種麥處也

安仁曉行

夙駕安仁道行行得自娛荒山圍野闊遠樹出林孤景晦長煙合天寒碧草枯歸心懷往路極日向平蕪

十七日早霜晴觀日出霧中喜而成詩

斜月夜窓白肅霜朝氣清長塗披素錦寒霧湧金鉦已作三冬雨何妨十日晴天公且相念莫遣暮雲生

再用前韻

久陰冬竟暖欲霽氣先清田舍占煙火軍家候鼓鉦風霜千里肅天地一朝晴明日知何日陽春又發生

次韻擇之過了頭巖

四面晴岡紫石巖如何渾作白皚皚須知暖入陰泉溜不

是寒封積雪堆

章巖

豁爾天開宇呀然夜不扃閑雲任棲宿密雨斷飄零破屋
僧常住高軒客屢經古今題寫處一半蘇文青

次韻擇之章巖

驅馬倦長道投鞭憇此巖來應六鼇戴跡是五丁劊泉脉
流青潤林梢擁碧巉老禪深閉戶客子且征衫

鉛山立春六言二首

雪擁山腰洞口春迴楚尾吳頭欲問閩天何處明朝嶺水
南流

行盡風林雪徑依然水館山村却是春風有脚今朝先到
柴門

次二友石井之作三首

一竇陰風萬斛泉新秋曾此弄清漣人言湛碧深無底只
恐潛通小有天

聯騎君登泉上亭黃塵雙眼想增明籃輿獨向溪南路惆
悵不成同隊行

泉嵌側畔一川明水石縈迴更有情聞說近來疏葺好想
應仍是舊溪聲

次韻擇之鉛山道中二首

幾月高堂闕問安歸塗不管上天難誦君兩疊思親句也
信從來取友端

行盡江湘萬疊山家山猶在有無間明朝漸喜登閩嶺澗
水分流響珮環

朱子大全 卷之五 次韻擇之發紫溪有作

明日振衣千仞岡夜分起看月和霜久知行路難如此不用悲歌淚滿裳

次韻別林擇之

暫時相別不須悲楚調淒涼政爾為幾曲清溪足相送一天明月豈曾離上堂嘉慶多為問緣道風光少賦詩更謝同袍二三子夜來幽夢滿春池

次韻別范伯崇二首

東歸亂 崇止此

平生罪我只春秋更作囂囂萬里遊賴有吾人肯相伴群譏衆詆不能憂

累月追隨今別離人生離合豈無時願言更勵堅高志力索窮探慰所思

有懷南軒老兄呈伯崇擇之二友二首

憶昔秋風裏尋盟湘水傍勝遊朝挽袂妙語夜連牀別去多遺恨歸來識大方惟應微密處猶欲細商量

積雨芳菲暗新晴始豁然園林媚幽獨窓戶愜清妍晤語心何遠謂日與擇之講論書題意未宣謂數收伯崇近書懸知今夜月同

夢舞雩邊

九日登天湖以菊花須插滿頭歸分韻賦詩得歸字

去歲瀟湘重九時滿城寒雨客思歸故山此日還佳節黃菊清罇更晚暉短髮無多休落帽長風不斷且吹衣相看下視人寰小祗合從今老翠微

歸報德再用前韻

幾枝藤竹醉相携何處千峰頂上歸正好臨風眺平楚却
須入谷避斜暉酒邊泉溜寒侵骨坐上嵐光翠染衣踏月
過橋驚易晚林垆回首更依微

雪中與林擇之祝弟登劉園之宴坐巖有懷南嶽
舊遊賦此呈擇之屬和并寄敬夫兄

風雪集歲晏掩關聊自休今辰展遐眺倚此寒巖幽同雲
暗空室皓彩迷林丘崩奔小澗歇飛舞增綢繆仰看鸞鶴
翔俯視江漢流乾坤有奇變湏洞驚兩眸三酌不自温倚
杖空冥搜悲歌動華薄璀璨忽滿裘向來一杯酒浩蕩千
里遊亦復有茲賞微言寄清酬解携今幾許光景逝不留
懷人眇山嶽省已紛愆尤對此奇絕境一懽生百憂茫然
發孤詠遠思誰能收

晦庵先生朱文公文集卷之五終

考異

拜張魏公墓下

劍履一作劍几

精忠一作精誠

孤憤一作忠憤

國威一作國勢

敬簡堂分韻

齋扉一作齋房

大雪馬上次韻

羽旄一作羽化

馬上口占

歌酒一作飲酒

烟村一作前村

馬跡橋 生志一作生意

高臺次韻

留清一作流清

石廩峰 家家有廩高如許大好人間快活年一作云教人鎮作豐年

願樂聖何妨萬億年

林間殘雪 忽復空枝墮殘白一作忽聽水

福巖讀張湖南舊詩 白雲未屬分符客一作今朝暫

奉別敬夫 要眇一作要妙 豈知一作豈無

淵乎齋 澹浮一作湛浮

雪梅 野橋一作斷橋

答林擇之四詩 家客一作家樂

再和油字韻 羽人一作新詩 日定一作日寄

觀西山 悠然一作悠悠

進賢客舍 同行一作同舟

山行至金步 悲重疊一作傷 稅駕有期心轉迫一作欲近

慈關心 轉切

臨庵先生朱文公文集卷之六

詩

和人遊西巖

平生壯志浩無窮老寄寒泉亂石中閑去披襟弄清泚靜
來合眼聽玲瓏不知澗寺晴時雨何似溪亭落處風吟罷
君詩自瀟灑此心端不限西東

次知郡章丈遊山之韻

前峰鸞鶴去無蹤邂逅荒尋得故宮但覺風烟隨意好便
驚塵土轉頭空提壺命駕幽期遠授簡哦詩妙處同安得
西山一丸藥共隨簫鼓向雲中

題周氏溪園三首

循澗闢芳園結亭對虛壁澄潭俯幽鑿空翠仰寒滴主人

心事遠妙寄塵壤隔豈爲功名期而忘此泉石

溪亭

危亭竹栢間悄舊日幽絕朔風一以厲愛此枝上雪仰悲
玄景駛俯歎群芳歇不用此時來那知歲寒節

雪亭

手種籬間樹枝繁不忍刪新亭最佳處勝日共歡顏景晏
春紅淺雨餘寒翠潛光風回巧笑桃李任漫山

嫣然亭

寄林擇之

故人千里寄書來三復塵襟頓豁開勸我從容深燕養莫
將佔畢苦沈埋杖藜此日應同趣揮塵何時得共陪珍重
相期俱努力自慙殊未竭淵才

送林擇之還鄉赴選三首

青驪去路欲駸駸回首猶須話此心一別便成三數月有
疑誰講過誰箴

門外槐花似欲黃高堂應望促歸裝箇中自有超然處肯
學兒曹一例忙

今朝握手送君歸馬上薰風拂面吹不用丁寧防曲學寒
窓久矣共心期

題林擇之欣木亭

危亭俯清川登覽自晨暮佳哉陽春節看此隔溪樹連林
爭秀發生意各呈露大化本無言此心誰與晤真驩水菽
外一笑和樂孺聊復共徜徉殊形乃同趣

擇之誦所賦擬呂子進元宵詩因用元韻二首

何處元宵好山房入定僧往來衣上月明暗佛前燈實際
徒勞說空華詎可憑還教知此意妙用一時興

何處元宵好寒龕獨寐人月窓同皎皎燈鏡自塵塵靜鑒

通天地潛思妙鬼神却憐迷路子狂走鬧城闐

次韻擇之梧竹二首并呈季通

竹塢深深處檀欒遶舍青暑風成慘淡寒月助清冷客去
空塵榻詩來拓采櫺此君同一笑午夢頓能醒

永日長梧下清陰小院幽自憐風嫋嫋客賦雨瀏瀏作別
今千里相思欲九秋更憐同社友復此誤淹留

擇之寄示深卿唱和烏石南湖佳句輒次元韻三

首

未識南湖景遙欣二子遊賞心并勝日妙語逼清秋賸欲
携書卷相將買釣舟微吟歸去晚杜若滿汀洲
平湖渺空闊積水暮生寒但見綠千頃不知深幾竿人間
元迫隘世路足艱難若了滄洲趣無勞正眼看

年來年去為誰忙三伏炎蒸忽變涼閱世謾勞心悁悁懷
人空得鬢蒼蒼詩篇眼界何終極道學心期未遽央安得
追尋二三子舞雩風月共徜徉

小詩奉送擇之仁友赴漕臺之招後篇喜趙公之
得士而不敢致私怨焉然別懷黯黯不能成章亦
足以見區區也二首

之子論交久深衷兩自知提携方有賴離索遽成悲聖處
應無數書來肯見私臨分莫惆悵努力共心期
珍重東臺老英聲舊所聞能懷吐哺意豈但枉書勤得士
看如許持心定不群願言推此志清濁見朋分

擇之賢友歸途左顧示以四明酬唱煥爛盈編三
復咏嘆想見聚遊之樂輒用黃山卽事之韻賦呈

擇之兼懷子重老兄順之賢友

十年身卧白雲堆已分黃塵斷往回不是幽人遺俗去肯
尋流水渡關來三秋風月從頭說千里湖山覲面開久欲
過逢須一快豈知勞結倍難裁

夜聞擇之誦師曾題畫絕句遐想高致偶成小詩
一幅瀟湘不易求新詩誰遣送閑愁遙知水遠天長外更
有離騷極目秋

次林擴之開善避暑韻二首

炎宮虛焰遍山村也到蕭蕭柳下門水玉秋菰那可得羨
君行處午陰繁
山齋幾日旱塵昏欲拂朱絃已憚煩涼意感君持寄我雨
聲花思滿曾存

送林熙之詩五首

君行往返一千里過我屏山山下村濁酒寒燈靜相對論
心直欲到忘言

仁體難明君所疑欲求直截轉支離聖言妙緼無窮意涵
泳從容只自知

天理生生本不窮要從知覺驗流通若知體用元無間始
笑前來說異同

十年燈火與君同誰道年來西復東不學世情雲雨手從
教人事馬牛風

古鏡重磨要古方眼明偏與日爭光明明直照吾家路莫
指并州作故鄉

春雪用韓昌黎韻同彭應之作

既有陽春曲那無白雪謠連天飛不斷著地煖還銷未掩
高人戶難齊衲子腰稍開銀世界漸長玉枝條興盡愁煙
艇行迷認野橋酒腸渾欲凍吟筆爲誰搖殘臘成三白餘
寒又一朝香隨梅蘂落輕伴柳花飄神女羞捐佩鮫人敢
獻綃東皇應好事避舍亦相饒

次彭應之餐雪韻

雪水淪清茗自謂絕世清終然犯煙火况復勞煎烹豈如
午霽餘探此竹外楹柘漿發甘和寶盃凝寒晶心骨既清
涼齒頰亦鏘鳴吞腥期永謝飲玉希長生

次彭應之魚樂亭韻

亭前活水破輕冰漸見遊鯈傍石稜老子自知魚樂處不
須莊惠與同登

與劉德明祝濟之胡子寬晚步偶成

雨罷寒逾勁霜威正凜然不知荒逕濕行到野橋邊曠望
情何極徘徊意莫傳清波涵衆影日落暗晴川

劉德明彥集祝弟以夏雲多奇峰爲韻賦詩戲成
五絕

出山幾何時歸來便長夏端居心不怡散策長林下
爲客厭城市還家辭世紛朝昏何所見但有四山雲
閉門事幽討歲月忽已多客來無可問與君共絃歌
于時本已懶胷次况亡奇若問中林趣婆娑祇自知
炎蒸不可柰雲氣滿前峰向夕風吹盡微聞遠寺鍾

仙洲新亭熹名以晝寒紫微張公爲書其額判院
劉丈乃出新句輒次高韻二首

聞說藤蘿外神龍舊所蟠
壁開千丈峽寫盡一襟寒
賞寄三杯酒歸投六尺竿
若無詩律好清絕不成歡

悄猜非人境寒蟬夏已稠
陽崖驚素雪午扇怯清秋
共說新亭好真堪妙墨留
賞心元不厭仙夢肯來遊

時已聞安國之計

次韻晝寒

行穿危磴盡林表見孤亭
澗瀉千尋白峰回四面青
塵襟元落落風腋自泠泠
一醉今何許無心賦獨醒

次判院丈晝寒亭韻有懷平父

把酒懷人處幽尋記往時
新亭勞指顧勝踐關追隨
爲報層欄出莫憂浮柱欹
惟應舊飛雪想象合心知

次判院丈清湍之什

明滅青羅帶周遭碧玉環
孤亭感陳迹茂樹喜重攀
爽氣

琴尊外泉聲枕簟間
詩成無寫處絕壁蘚痕斑

遊密菴分韻賦詩得還字

我行得佳友勝日尋名山
春山旣妍秀清溪亦潺湲
行行造禪扉小憇腰脚頑
窮探意未已理策重躋攀
入谷翳蒙密俯澗隨泓灣
誰將百尺綃掛此長林間
雄聲殷地厚洪源瀉天慳
偉哉竒特觀償此一日閑
所恨境過清悄愴暮當還
顧步三嘆息人生何苦艱

遊密菴分韻賦詩得絕字

閩鄉饒竒山仙洲故稱傑
巍然一峰高復與衆山絕
傳聞極目處天水遠明滅
萬里倏往還三光下羅列
我來發孤興徑欲躋崿嶮
病骨竟支離何當攀去轍

次韻宿密菴

忽作經宵別，曾奇莫與陳。暮歸誇得句，寒苦頓生春。道義知無數，文章自有真。它年應共說，此日自由身。

遊密菴

弱齡慕丘壑，茲山屢遊盤。朝躋青冥外，暮陟浮雲端。晴嵐染襟裾，水石清肺肝。俯仰未云已，歲月如飛翰。中年塵霧牽，引脰空長歎。曠歲一登歷，心期殊未闌。矧此親友集，笑談有餘歡。結架迫巒磻，徙倚臨奔湍。共惜前古秘，今爲後來觀。落景麗雲木，回風馥秋蘭。林昏景益佳，悵然撫歸鞍。諒哉故山好，莫遣茲盟寒。

游晝寒以茂林修竹清流激湍分韻賦詩得竹字
仙洲幾千仞，下有雲一谷。道人何年來，借地結茅屋。想應厭塵網，寄此媚幽獨。架亭俯清湍，開徑玩飛瀑。交游得名

勝還往，有篇牘。杖屨或昂來，共此巖下宿。夜燈照奇語，曉策散游目。茗椀共甘寒，蘭皋薦清馥。至今壁間字，來者必三讀。再拜仰高山，懔然心神肅。我生雖已後，久此寄齋粥。孤興屢呻吟，群遊幾追逐。十年落塵土，尚幸不遠復。新涼有佳期，幾日戒征軸。宵興出門去，急雨遍原陸。入谷尚輕埃，解裘已銀竹。虛空一瞻望，遠思翻蹙蹙。怱袒跣，亟躋攀。冠巾如膏沐，雲泉增舊觀。怒響震寒木，深尋得新賞。一簣今再覆，同來况才彥。行酒屢更僕，從容出妙句。珠貝爛盈匊，後生更疊疊。俊語非碌碌，吾纓不復洗。已失塵萬斛，所恨老無奇。千毫真浪禿。

聞季通德明諸友入山以詩迎之仍請先往觀瀑布

勝友南窓底看書老歲華不因寒瀑響肯到野僧家古徑
開能久新亭去豈賒躋攀那可緩寂寞有雄夸

次觀瀑布韻

快瀉蒼崖一道泉白龍飛下鬱籃天空山有此真竒觀倚
杖來看思凜然

和季通畫寒韻

萬壑爭流處千年樹石幽危亭因我作勝日爲君留酒笑
紅裙醉詩慙雜珮酬尚嫌心境窄更約九垓游

次韻謁忠顯劉公墓下

理亂由來今古同覆車那肯戒前蹤紛紛誤國人無數不
昧丹心獨此公

次季通畫寒亭韻二首

不信高懷與世殊清游試問與誰俱相將靜聽潺湲水洗
滌塵襟肯自污

山行前後有光輝撲撲浮嵐翠染衣直到仙洲竒絕處畫
寒亭下玉龍飛

飲清湍亭石上小醉再登畫寒

水邊今日共傳杯多謝殷勤數子來三伏炎蒸那有此百
年懷抱頓能開雲山合匝還生霧雪澗崩騰怒吼雷却恨
蒼屏遮遠目凌風直欲跨蓬萊

次清湍亭韻二首

上下青山今白頭穿雲入塢未能休因君去覓仙洲路却
嘆周南獨滯留

仄徑穿林欲造天未妨停策聽涓涓知君便有刀頭意莫

志仙洲澗底泉

立春大雪邀劉圭甫諸兄遊天湖

同雲被四野寒氣慘悲涼回風一以定密雪來飄揚時當
冬候窮開歲五日彊蓬巷無與適陟此瓊臺岡賓友既迫
隨兒童亦携將攀躋得冢頂徙倚聊彷徨俯視千里空仰
看萬鶴翔遠迷亂峰翠近失平林蒼偃薄瑩神骨咀嚙清
肝腸朗詠招隱作悲吟黃竹章古人不可見來者誰能量
且復記茲日他年亦難忘

次圭父游將軍巖韻二首

極目危岑杳靄間誰將層棟壓巔岈瘦筇上上莫辭遠絕
境行行得細觀智井尚餘茅經處考槃無復碩人寬倦來
拂石支拳睡萬壑吟風午夢闌

陳迹真成俯仰間回頭猶認碧巔岈更煩地主殷勤意得
盡雲山表裏觀景晏共愁歸路遠年侵獨負酒盃寬明朝
覓句酬珠玉剩喜詩情却未闌

圭父約為金斗之遊次韻獻疑聊發一笑

幾日春風未破寒遠峰晴露玉巔岈不成蠟屐携筇去且
復鈎窓枉頰觀聞道追遊當作意故應期日尚能寬陰崖
凍合無垂練却恐詩翁與易闌

次彥集經營別墅之作

回北成南指顧間要令華敞對巔岈家山信有千巖擁家

堂見武夷諸峯

雲月何妨兩處觀傑閣已資隣築勝熹近象知府掇賜舊第樓

居

新基還見繚牆寬老仙鶴骨殊蕭爽歸興從今豈易闌

彥集圭父擇之同飲白雲精舍以醉酒飽德為韻

熹分得飽字醉中走筆奉呈

奔趨名利場禍福急相絞夜窓一反側膚垢紛兩爪豈知
親朋集晚食聊一飽心期共悠悠文字各稍稍華燭旣屢
更詩腸亦頻攪寒更儘渠深孤諷寧至卯

次劉圭甫和人梅花韻

意行欲遍江村路恰到詩人斷魂處梅花未肯笑春風蔓
草何須怨零露歸來四壁無餘聲俯檻祇有寒塘青美人
邂逅一笑粲倒影的皜踈枝橫寸心久矣遺紛雜不但老
禪齋夏臘此時恨恨欲何言本根落落幾難合走遍諸君
詩卷中西湖東閣病還同劃然長笑驚夢破碧雲散盡山

叢叢

平父有攀條嚼蕊繞千回日暮碧雲驚馬四合之句故云

奉酬圭父末利之作

玉蕊琅玕樹天香知見薰露寒清透骨風定遠含芬爽致
銷繁暑高情謝曉雲遙憐河朔飲那得醉時聞

奉酬圭父白蓮之作

忽傳夔府句并送遠公蓮翠蓋臨風迥冰華浥露鮮舞衣
清縞袂倒景爛珠躔想象芙蓉闕冥冥絕世緣

次圭父觀魚韻

平生三伏斷追遊誰喚來穿澗樹幽初訝網橫天影破忽
驚人蹴浪花浮鳴柳不用齊吳榜鼓柁何須學楚謳便有
金盤堆白雪却憐清泚向東流

奉同黃子厚賦白芙蓉呈劉彥集平父

湛湛曲池水曉含風露清田田綠羅蓋粲粲白玉英澹然
絕世姿不與穠艷并俯鑒冰雪影詎懷兒女情山中徒淹

留堂下空目成獨有志機客相看兩無營

觀洪遵雙陸譜有感呈劉平甫范仲宣二兄

近從新譜識梟盧擬喚安陽舊博徒只恐分陰閑過了更

教人誚牧諸奴陶桓公嘗語人曰大禹聖者乃惜寸陰至於時死無聞於後是自棄也諸參佐或以談戲廢事者乃命取其酒器蒲搏之具悉投之江吏將則加鞭朴曰樛蒲者牧猪奴戲耳君子當正其衣冠攝其威儀何有蓬頭跣足自謂宏達耶

次劉彥集木犀韻二首

衆芳搖落九秋期橫出天香第一枝莫似寒梅太孤絕更

交遙夜笛中吹

仙衣纔試鬱金黃便覺秋風滿院芳定觀極知先透徹通

心豈是故迎將

秋到寒巖桂樹叢小山吟罷思悲翁不妨更作淹留計占

取人間十里風

寄謝劉彥集菖蒲之貺二首

君家蘭杜久萋萋近養菖蒲綠未齊乞與幽人伴岑寂小

窓風露日低迷

泉清石瘦碧纖長秋露懸珠炯夜光箇裏無窮閑造化別

來誰與共平章

公濟惠山疎四種并以佳篇來貺因次其韻

痺

靈草生何許風泉古澗傍褰裳勤采擷枝筍噉芳香冷入

玄根闕春歸翠穎長遙知拈起處全體露真常

芹

晚食寧論肉知君薄世榮瓊田何日種玉本一時生白鶴

今休誤青泥舊得名收單還炙背北闕儻關情時公濟試禮部

筍

新筍因君寄康廬入夢中丹元餘故宅翠竹尚餘風日日

來威鳳年年饌籜龍猶嫌有兼味不似一源功廬山簡寂觀道士陸

脩靜之所居從遠法師蓮社之遊賜號丹元先生觀有甜苦筍今者所惠乃甜筍也

蕨

西山採蕨人蓬首尚傾國懷哉遠莫致引脰氣已塞頃筐忽墮前此意豈易得良遇不可遲枯筍有餘力

題吳公濟風泉亭

澗谷居永久高情未云酬茲焉發天祕始造寒巖幽上有茂樹陰下有清泉流結亭倚蒼峭鑿磴窮嵌丘翠壁有屏立青蘚亦環周竭來憇永夏凜若臨清秋仰空韻笙竽俯

檻鏘琳瑯幽聽一以會悠然與神謀遐哉超世心暇日聊娛憂笑問車馬客誰能淹此留

再題吳公濟風泉亭

華林翠礪響風泉竟日閑來石上眠更結危亭俯幽聽未妨長作地行仙

奉和公濟兄留周賓之句丙申九日

端居感時序駕言誰適從聊携二三子杖履此日同悠哉素心人宴坐空巖中真成三秋別夢想情何窮行行陟崇岡引眎希高風忽然兩相值俯仰迷西東鱸堂偶休閒雞黍聊從容不辭腰脚勞共上西南峰佩萸笑長房把菊追陶公遐觀衆山迥一酌千慮融興罷復來歸杳靄秋堂空窺樽訖餘瀝倚閣聞踈鍾主人意未闌驪駒勿怱怱

寄吳公濟兼簡李伯諫五首

客子歸來春未深，祗應寒雨罷登臨。
閑窓竟日焚香坐，一
段孤明見此心。

三徑莓苔晝掩關，君來問道却空還。
從今蠟屐應無恙，有
興何妨再入山。

盤翁別去久無書，可復因循自作疎。
珍重寄聲煩問訊，箇
中消息定何如。

繁絃急筦盛流傳，清廟遺音久絕絃。
欲識寥寥千古意，莫

將新語勘塵編。

謂鹽官中庸

憶昔殊方久滯淫，年深歸路始駸駸。
傍人欲問簞瓢樂，理
義誰知悅我心。

公濟和詩見閔耽書，勉以教外之樂以詩請問二

首

至理無言絕淺深，塵塵剝剝不相侵。
如云教外傳真的，却
是瞿曇有兩心。

未必瞿曇有兩心，莫將此意攪儒林。
欲知陋巷憂時樂，只
向韋編絕處尋。

伯諫和詩云：邪色哇聲方漫漫，是中正氣愈駸駸。
予謂此乃聖人從心之妙，三歎成詩，重以問彼二
首。

任從耳畔妍聲過，特地胷中順氣萌。
箇裏詎容思勉得，羨
君一躍了平生。

闕里當年語從心，至今蹤跡尚難尋。
况君直至無心處，肯
向人前話淺深。

游百丈山以徙倚弄雲泉分韻賦詩得雲字

執熱倦煩跼駕言起宵分隨川踏曉月度嶺披朝雲攀緣
白石梯拂拭蒼蘚紋噴薄驚快靚琮瑋喜先聞竒哉此精
廬眇然隔塵氛諸公肯同來定非俗子群永日坐清樾短
章策竒勲慨然念疇昔聯裾已荒墳中路忘磬析寸心謾
絲焚惟應泉石願三生有餘薰茲游獲重尋十載心氤氳
他年訪舊躅山靈莫移文

百丈山六詠

石磴

層崖俯深幽微逕忽中斷努力一躋攀前行有竒觀

小澗

兩崖交翠陰一水自清瀉俯仰契幽情神襟頓飄洒

山門

置屋兩山間巧當竒絕處峽束百泉傾澗激回風度

石臺

出谷轉石稜俯身窺木末夕眺嵐翠分朝躋雲海澗

西閣

借此雲窓眠靜夜心獨苦安得枕下泉去作人間雨

瀑布

巔崖出飛泉百尺散風雨空質麗晴暉龍鸞共掀舞

游蘆峰分韻得盡字

蘆山一何高上上不可盡我行獨忘疲泉石有招引須臾
出蒙密矯首眺無畛已謂極崢嶸仰視猶隱嶙新齋小休
憇餘力更勉毘東峰切霄漢首夏正凄緊杖策同攀躋極

目散幽窘萬里俯連環千重瞰孤隼因知平生懷未與塵
慮泯歸塗采薇蕨晚餉雜蔬筍笑謂同來人此願天所允
獨往會淹留寒棲甘菌蠹山阿子慕予無憂勒回軫

同丘子服游蘆峰以嶺上多白雲分韻賦詩得白
字

登巖出罽塵入谷媚泉石悠然愜幽趣不覺幾朝夕高尋
倦冢頂舊賞歎陳迹仰慙仙人杖俯愧謝公屐昨日吾弟
來勇往意無斃今晨蓐食罷千仞一咫尺心期未究竟眼
界已開闢浮野衆麓青縈雲兩川白須臾互吞吐變化已
今昔曠若塵慮空悲哉人境窄平生有孤念萬里思矯翮
感此復冲然胡爲尚形役

登蘆峰

行到蘆峰最上頭幾回振策又還休因君好句撩孤興却
恨雲烟未肯收

將游雲谷約同行者

躋險擇幽棲寒蘿結茅屋疏泉下石澗種樹滿煙谷時登
北原上一騁千里目雲物下逶迤岡巒遠重複暫辭忽曠
歲再往恨牽俗因悲昨游侶或已在鬼錄前年元履同游暄風悟
新陽一雨欣衆綠明發君莫遲幽期我當卜

九月六日早發潭溪夜登雲谷翌旦賦此

懷山不能寐中宵命行軒亭午息畏景薄暮登危巒峻極
踰百磴縈紆欲千盤行行遂曛黑月落天風寒羽人候中
塗良朋集林端問我何所迫而嘗茲險艱疲勞旣云極飢
渴不能言投裘卧中丘幸此一室寬怒號竟未夕客枕無

時安旦起闢幽戶竹樹青檀藥驚喜非昔覩披尋得新觀
淹留十日期俯仰有餘歡寄語後來子勿辭行路難

雲谷二十六詠

雲谷

寒雲無四時散漫此山谷幸乏霖雨姿何妨媚幽獨

南澗

危石下崢嶸高林上蒼翠中有橫飛泉崩奔雜奇麗

瀑布

峰回危逕轉垂練忽千尋不爲登山倦躊躇秋澗陰

雲關

白雲去復還黃塵到難入只有澗水聲出關流更急

蓮沼

亭亭玉芙蓉迥立映澄碧只愁山月明照作寒露滴

杉逕

南起雲關口縈紆上草堂天風發清籟山月度寒光

雲莊

小丘橫翠几層嶂復嵯峨釋耒閑來看巖姿此處多

泉硤

入關但平田復此得清響何必問真源神襟一蕭爽

石池

兩岸蒼峭石護此碧泓寒秋月來窺影驪珠吐玉盤

山楹

山楹一帳望恨此雲迷谷仙人不可期縹緲雙髻綠

藥圃

長鑱斲靈根時此泉下圃珍劑未須論丹莢已堪煮
井泉

山高澤氣通石竇飛靈液默料谷中雲多應從此出
西寮

畚田種胡麻結草寄林樾珍重無心人寒棲弄明月
晦菴

憶昔屏山翁示我一言教自信久未能巖棲冀微效
草廬

青山繞蓬廬白雲障幽戶卒歲聊自娛時人莫留顧
懷仙

西望多奇峰北瞰獨仙府欲致武夷君石壇羅桂醕
揮手

山臺一揮手從此斷將迎不見塵中事惟聞打麥聲

雲社

自作山中人卽與雲爲友一嘯雨紛紛無勞三奠酒

桃蹊

澗裏春泉響種桃泉上頭爛紅紛委地未肯出山流

竹塢

悄悄桃蹊北蕭慘竹塢深不堪秋夜永風雨助悲吟

漆園

舊聞南華仙作吏漆園裏應悟見割憂嗒然空隱几

茶坂

携筇北嶺西采擷供茗飲一啜夜窓寒跣趺謝衾枕

絕頂

當年赫曦臺移治在茲嶺寥廓無四隣三光疑倒影

北澗

土斷川亦分北下成陰澗秀石得佳名服膺吾敢慢

澗有石仁義

中溪

南下東嶺阿云是中溪道巖樹愛樛枝石田悲蔓草

休菴

別嶺有精廬林巒亦幽絕無事一往來茶瓜不須設

雲谷雜詩十二首

登山

夕陽翳東峰微月下西嶺不辭青鞋穿陟此巖路永巖路永且躋中情何耿耿

值風

山下風吹衣山上風拔木茅茨何足保瀛海慮翻覆未念執鬯人無心還自恣

見易傳震卦

翫月

風起雲氣昏風定天宇肅遙遙萬里暉炯炯穿我屋良友共徘徊山中詎幽獨

謝客

野人載酒來農談日西夕此意良已勤感歎情何極歸去莫頻來林深山路黑

勞農

四體久不勤筋力坐駑緩何事兩山阿離離豆苗滿多謝植杖翁居然見長短

講道

高居遠塵雜崇論探杳冥疊疊玄運駛林林群動爭天道
固如此吾生安得寧

懷人

吾黨二三子欲來從我遊塵機諒擾擾遐諾終悠悠空山
日復晚佇立悵夷猶子厚伯崇有約不至

倦遊

故人千里別約我仍丹丘云何一解散書到令人愁此山
豈不幽何必賦遠遊時得伯恭書報罷天台之遊

修書

細書厭塵累執簡投雲關靈鑰啟玄秘肅斧鋤幽姦書成
莫示人留置此山間

宴坐

登山思無窮臨水心未厭沈痾何當平膏肓今自斫默坐
秋堂空遐觀靡餘念

下山

行隨流水聲步出哀壑底綠樹枝相樛白澗石齒齒樹石
無窮年流水日千里

還家

出去柴門掩歸來蕙草秋素琴林下吐清芬衣上浮欲寄
山中友日暮悵離憂

雲谷合記事目效俳體戲作三詩寄季通

雲關須早築基趾要堅牢栽竹行教密穿池岸欲高乘春
移菡萏帶雪覓蕭椽謂杉徑也更向關門外疏泉斬亂蒿

堂成今六載上雨復旁風逐急添茆蓋連忙畢土功謂柱

下

粵桂林何日秀蘭逕幾時通并築雙臺子東山接水筒
莊舍宜先立山楹却漸營泉疏藥圃潤堰起石池清早印
荒田契仍標別戶名想應頻檢校祇恐欠方兄

雲谷懷魏元履

歎息良齋老當年共此來千峰竒絕處一望興悠哉病怯
披雲卧詩勞擁鼻裁祇今何處所宿草闕餘哀

送許順之南歸二首

門前三逕長蒿萊愧子殷勤千里來校罷遺書却歸去此
心元自不曾灰

幾年江海事幽尋徧與雲僧話此心今日肯來論舊學歲
寒猶恐雪霜侵

宿雲際寺許順之將別以詩求教次韻

薄暮投花縣聯車入翠微長林生缺月永夜照寒扉情話
欣無斃離懷悵有違勉哉疆毅力千里要同歸

挽汪端明三首

聖主興炎運明公起妙年材推漢庭右學自北方傳出入
丹心壯安危素髮鮮空餘題劍在光燭舊林泉

曠宇元無際孤標自不群物情良有寄讒口詎堪開未許
時明政猶堪史闕文衣冠忽長夜餘子謾紛紛

先友當年盛斯文元祐徒艱虞共流落存沒半嗚呼顧我
真無賴逢公幸不孤祇今還一慟卽此是窮塗

彥集奉檄歸省示及佳篇次韻奉酬呈諸兄友

游子思親久聚糧不堪官裏簿書忙平生况少鷹鷂意此

日尤慙時世粧臘雪未消歡奉檄春風初轉喜還鄉上堂
佳慶從容問一嚼何妨累十觴

彦集兄再適臨汀惠顧蓬華賦詩留別眷予良勤
次韻祖行言不盡意

賸喜君才老更成伊優叢裏見孤撐官身未免心徒壯親
膝頻違淚欲橫簿領不嫌春筍束廉聲要比玉壺清枉車
投翰殷勤甚安得仁言與贈行

圭父爲彦集置酒白蓮沼上彦集有詩因次其韻
呈坐上諸友

大阮歸來客滿堂更移芳席近回塘共憐的皪水花淨并
倚離披風盖涼銀筆看題青玉案佳人悵望碧雲鄉此時
此景真愁絕病著無因爲舉觴

寄題宜春使君定叟張兄隱齋

大專槃萬生異體實同氣云胡分彼已直以私自蔽
君家桂林伯德學妙一世閉戶不忘憂纓冠矧行義
眷言介弟賢四益謹先畀千里各分符一心同盡瘁
遠題齋戶冊來表棲息地系述寫心胷俯仰資惕厲
陽嘉旣滌蕩陰慝失封閉介然彼苛瘡嚇若我黥劓
拊摩極哀恫征取敢常藝戰兢一日力洋溢四封被
君看物我間隱顯豈殊致願反振民功更懋根本計

次韻題平父兄重建一枝堂

畫戟朱門枕碧山貂蟬元自出儒冠更餘此日林間樂遠
繼當年膝下歡命駕賓朋千里近放懷琴酒百憂寬遺編
却好傳孫子莫遣因循學宴安

日用自警示平父
圓融無際大無餘卽此身心是太虛不向用時勤猛省却
於何處味真腴尋常應對尤須謹造次施爲更莫疎一日
洞然無別體方知不枉費功夫

抄二南寄平父因題此詩

闕里言詩得賜商子貢千秋誰復與相望鄒汾孟子文斷

簡光前載關洛張子程子新書襲舊芳折句分章功自少吟風

弄月興何長從容咏嘆無今古此樂從茲樂未央

題劉平甫定菴五詠

定菴

風生長林悲雲起空谷瞑下有不死人一室常在定

巢雲

入山何所見雲樹春濛濛安知巢居子避世於其中

山臺

林居厭棲迷山頂幸清曠無事一登臨却愁心浩蕩

井泉

開山昔何人鑿此寒泉井獨夜漱瓊瑤冷然發深省

壽穴

百年不可期一壑當頂卜自憐木偶人空羨王官谷

劉平甫席上分韻得寫字

歲暮風雨交流雲暗平野公子燕華姻招呼及同社

高情寄壺觴晤語到風雅剪燭夜堂深幽懷共輸寫此詩恐當

首一

劉平甫分惠水梔小詩爲謝二首

年來衰懶罷書淫偶向盆山寄此心何事涼陰老居士便分幽賞助清吟

何處飛來簷蔔林老枝樛屈更蕭條淒涼杜老江頭句坐對行吟得自箴

少陵江頭五詠於梔子詩云於身色有用與道氣傷和

和喜雨二絕

兩師誰遣送餘春珍重天公惠我民且看歡顏垂白叟莫愁頰頰踏青人

黃昏一雨到天明夢裏豐年有頌聲起望平疇烟草綠只今投筆事農耕

和章國華祈雨呈平父諸兄三首

極目平疇半欲枯遙知精禱意無餘更憐不待豚蹄祝便得汗邪暗滿車

九重清夜仰昭回旱魃知從何處來不是幽人祈得雨又煩丹詔走風雷

晴窓揮汗若驕陽雨檻披衣快晚涼多謝龍公餘事業爲驅寒谷變炎方

山館諸兄共賦驟雨鷺鷥二絕

平疇焦渴不堪論簫鼓悲秋徹帝閣霹靂一聲雲自墨山前山後雨翻盆

雨罷微塘凜欲秋飛來白鳥便夷猶從今認得橫塘路水遠天長百不憂

唐石雪中

春風欲動客辭家霖潦縱橫路轉賒行到溪山愁絕處千林一夜玉成花

秋日同廖子晦劉淳叟方伯休劉彥集登天湖下
飲泉石軒以山水含清暉分韻賦詩得清字

閒居寡儔侶掩關抱孤清良友倏來止曠然舒我情矧此
涼秋初暑退裳衣輕相與一携手東山眇遐征前穿林嶺
幽俯瞰川原平降集崖寺古徘徊濁醪傾長吟伐木篇潛
鱗亦相驚願結沮溺耦窮年此巖耕

淳熙戊戌七月二十九日與子晦純叟伯休同發
屏山西登雲谷越夕乃至而季通德功亦自山北
來會賦詩記事以雲卧衣裳冷分韻賦詩得冷字
端莢得幽貞考槃寄茲嶺未成長往計抱恨中耿耿秋風
吹庭樹遙夜枕席冷感彼歲序移慨此心事永明晨發孤
興趣駕向絕境躋攀力雖倦想象意逾騁雲山一以眺俯

仰疑倒景檢校石田收眷戀茅屋靜淹留復未遂外物愧
張邴珍重同來人妙語各清整擊節三嘆餘超然得深省
宿黃沙以山如翠浪湧分韻賦詩得如字

日中秣吾馬日暮膏吾車崎嶇涉南嶺浩蕩凌八嶇夜雨
薦峰前朝登碧琳瑯蒼茫永歎罷翁忽清景徂去此二三
子我行將焉如崔嵬正丘垤萬里思南圖

雲谷次吳公濟韻

昔營此幽棲邈與世相絕誓將百年身來守固窮節心期
苦未遂歲月一何闊終然匹夫志肯遽甘沒沒茲晨復登
瞰目盡雲一抹激烈永嘯餘朗寥高韻發夫君內德備不
學王駘兀觀心見參倚出世自英傑竭來肯顧我同去弄
雲月微言得深扣大句亦孤拔多謝警疎慵未敢嘆瞻忽

更問毫釐間是同端是別

宿休菴用德功壁間韻贈陳道人

暮入千峰裏寒棲一草菴室連丹竈煖厨引石泉甘塵慮
紛難到神光暖內含非君有道氣孤絕詎能堪

挽劉樞密三首

天昇經綸業家傳忠義心謀謨經國遠勲烈到人深廊廟
風雲斷江湖歲月侵一朝成殄瘁九牧共沾襟
談笑平蠻策焦勞振廩功復讐乖宿志忍死罄餘忠人嘆
百身贖天悲一鑑空九原終莫起千載自英風
久矣身無用前恩嘆莫償豈期今老大復此重悲傷淚向
遺書盡心隨宿草荒諸君那不死慟絕鬢成霜

武夷七詠

天柱峰

屹然天一柱雄鎮幹維東祇說乾坤大誰知立極功

洞天

絕壁上千尋隱約巖栖處笙鶴去不還人間自今古

畫鶴

誰寫青田質高超鴈鷺群長疑風月夜清唳九霄聞

仰高堂

面勢來空翠哦詩獨好仁懷人今已矣誰遣棟梁新此堂與迎

綠亭皆劉建康所名禮記引高山仰止
景行行止之詩而曰詩之好仁如此

趨真亭

危亭久已傾祇有頽基在何事往來人不知容鬢改

大小藏巖

藏室岌相望塵編何莽鹵欲問伯陽翁風煙迷處所

丹竈

仙人推卦節煉火守金丹一上煙霄路千年亦不還

壬子三月二十七日聞迅雷有感

誰將神斧破頑陰地裂山開鬼失林我願君王法天造早
施雄斷答群心

晦庵先生朱文公文集卷六終

考異

和人游西巖 澗寺一作澗樹

題周氏溪園三首一首無後

次韻梧竹 檀欒一作團欒 慘淡一作慘澹

次開善避暑韻 花思滿曾存一作花氣

送林熙之 妙緼一作妙蓄 只自一作合自 若知體用元無

間一作若明體 用真無間

晚步偶成 雨罷寒逾勁一作雨歇 暗晴川一作倍

和晝寒韻 爭流一作陳 樹石一作謝石

謁劉公墓 誤國一作迷國 此公一作我公

次彥集別墅 信有一作倍有

次和人梅花韻 本根一作本願

焯

芳香

芬一作香

翠穎

秀穎一作穎

芹

收單

收一作功

筍

籜龍

伏龍一作龍

寄吳公濟

客子

投一作綬

祗應

祗一作因

罷登

倦一作登

從今

只一作今

寄聲

寄一作音

年深

年一作來

欲問

若一作問

游百夾山

隨川

隨一作風

石臺

出谷

山一作谷

同丘子服游蘆峰

兩川

滿一作川

杉逕

南起

晨一作起

桃蹊

裏春

東一作春

絕頂

移治在茲嶺

一作移來名此嶺

休菴

林巒

林一作澗

值風

山上

山一作中

謝客

酒來

酒一作至

頻來

煩一作來

修書

雲關

靈一作關

定菴山臺

林居

林一作中

雲谷次吳公濟韻

觀心見參倚

極一作秉心清淨

更問

且一作問

世自

世一作有

晦庵先生朱文公文集卷之七

詩

崇壽客舍夜聞子規得三絕句寫呈平父兄煩爲
轉寄彥集兄及兩縣間諸親友

空山初夜子規鳴靜對琴書百慮清喚得形神兩超越不
知底是斷腸聲

空山中夜子規啼病怯餘寒覓故衣不爲明時堪眷戀久
知岐路不如歸

空山後夜子規號斗轉星移月尚高夢裏不知歸未得已
驅黃犢度寒皋

寄雲谷瑞泉菴主

憶昔誅茅日山房我自名風埃猶俗累煙雨負巖耕多謝

空門侶能同物外情肯來分半壑聊爾度平生少待清秋日閑尋遠嶽盟不知誰是客一笑絕塵纓

入南康界閱圖經感陶公李渤劉凝之事戲作

長官定笑歸來晚中允應嫌去却回惟有山人莫相笑也曾還俗做官來

屢游廬阜欲賦一篇而不能就六月中休董役卧

龍偶成此詩

登車閩嶺徼息駕康山陽康山高不極連峰鬱蒼蒼金輪西嵯峨五老東昂藏想象仙聖集似聞笙鶴翔林谷下淒迷雲關杳相望千巖雖競秀二勝終莫量仰瞻銀河翻俯看交龍驤長吟謫仙句和以玉局章疇昔勞夢思茲今幸徜徉尚恨忝符竹未愜棲雲房已尋兩峰間結屋依陽岡

上有飛瀑駛下有清流長循名協心期弔古增悲涼壯齒乏竒節頽年矧昏荒誓將塵土蹤暫寄雲水鄉封章儻從欲歸哉澡滄浪

讀李賓老玉澗詩偶成

獨抱瑤琴過玉溪琅然清夜月明時祗今已是無心久却怕山前荷簞知

立秋日同子澄寺簿及僉判教授二同寮星子令尹約周君段君同游三峽過山房登折桂分韻賦詩得萬字輒成十韻呈諸同游

抗塵幾何時猿鶴共悲怨豈知朱墨暇乃適山水願茲晨秋令初休沐謹邦憲佳賓忽四來英僚亦三勸駕言北郭門謝此旃隼建散目山崔嵬縱轡路修蔓凭欄快倒峽躋

壑困脫輓追攀林樾深
懽喜脚力健登高眺遠
浦衆景爭自獻何必仍
丹丘徑欲凌九萬

和子澄白鹿之句

經旬不到鹿場陰
夢想飛馳不自禁
幸有高軒同勝賞
何妨折屐共幽尋
徘徊未厭詩書樂
感慨難忘忠孝心
更對豐鐫哦伐木
風泉雲壑助清吟

暇日侍法曹叔父陪諸名勝爲落星之游分韻得
往字率爾賦呈聊發一笑

長江西委輸匯澤東
滉漾中川屹孤嶼
佛屋寄幽賞我來
此何日秋氣欲蕭爽
共載得高儔良晨豈
孤往酒酣清獻發浪湧
初月上疊鼓喚歸艫
陳迹眞俯仰

九日奉陪高州史君黃陽別駕會稽丞公善化明

府仲衡詩伯并屈子
美元範二兄及郡中諸文武
同登紫霄絕頂南望
江湖北眺淮甸少快心目
旣歸又得仲衡佳篇句法
清麗情致悽惋三復不勝
起予之歎謹次韻呈請皆賦
之以紀一時之盛甚
惠甚望

此日登高處千巖錦樹稠
無人朝落帽有客賦悲秋
忽忽塵中老忽忽物外游
江湖空極目不盡古今愁

下元節假行視陂塘因與
賓友挈兒甥出郭登山
歸賦二詩示子直春卿及
折桂雲谷并寫呈郡中
諸寮友

廬阜東北際岩堯五峰尊
中巖穹林繞青天白雲屯
郡閣有佳眺徙倚空朝昏
今晨幸休暇發軔北郭門
牽蘿出林

端躡屐躡雲根高尋却深宦小憇欣潺湲古殿宿寒靄新
薨麗朝暎扶藜陟東岡夙昔規曾軒却倚千尋峭前窺百
泉奔長風卷浮埃江湖渺相吞結架雖未諧雄瓌已難論
同來俱勝流晤語仍王孫已踐支許諾不慙夙尚蒐賦詩
紀茲日歲晚期相敦

卧龍之遊得秋字賦詩紀事呈同遊諸名勝聊發
一笑

躡石度急澗窮源得靈湫豁舒兩對立噴薄中怒投何年
避人世結屋棲巖陬嘉名信有託故迹誰能求我來一經
行淒其仰前修鄰翁識此意伐木南山幽爲我立精舍開
軒俯清流多岐諒匪安一壑真良謀解組云未遂驅車且
來游嘉賓頗蟬聯野藪更獻酬飲罷不知晚欲去還淹留

躡攀已別峰窺臨忽滄洲下集西澗底沉吟樹相樛王淵
茗飲餘三峽空尊愁懷賢旣伊鬱感事增綢繆前旌向城
郭回首千峰秋

卧龍之遊錢通守得江字不及賦詩已解維矣熹
用其韻紀事以贈并附卷末

君行安所適衝風泝濤江傳聞閩州好未見心已降邀君
康山遊聽此巨壑淙班坐酌溪石幽尋憇雲窓勸君盡此
杯錦帆已稠杠明年儻來東鳴鏡建高幢訪我深澗底晤
言絕紛隴城南且細說慰我心忼忼

分韻得眠意二字賦醉石簡寂各一篇呈同游諸
兄

驅車何所適徃至秋雲邊企彼澗中石舉觴酌飛泉懷哉

千載人矯首辭世喧
 凄凉義熙後日醉
 向此眠仰視但青冥
 俯聽驚潺湲起坐
 三太息涕泗如奔川
 神馳北關陰思屬東
 海壻丹衷竟莫展
 素節空復全低徊萬
 古情惻愴顏公篇為
 君結茅屋歲暮當來
 還 醉石

天秋山氣深日落林
 景翠亦知後騎迫且
 復一流憇環瞻峰列
 屏迴矚泉下凜永懷
 仙陸子久挹浮丘袂
 于今知幾載故宇日
 荒廢空餘醮壇石香
 火誰復繼更憐韋刺
 史五字有真意虎竹
 付歸人悲風起橫吹
 沉吟向絕迹浩蕩發
 幽寄來者知為誰念
 我儻三喟 簡寂

尋白鹿洞故址愛其幽
 邃議復興建感歎有
 作清冷寒澗水窈窕
 青山阿昔賢有幽尚
 眷言此婆娑事往今
 幾時高軒絕來過學
 館空廢址鳴絃息遺
 歌我來勸相

餘款策蹇綠蘿謀野
 欣有獲披圖知匪訛
 永懷當年盛莘莘矜
 多博約感明恩涵濡
 熙泰和淒涼忽荒榛
 俯仰驚頽波發教逮
 綱紀喟然心靡它伐
 木循陰岡結屋依陽
 坡一朝謝塵濁歸哉
 碩人邁 時已疏上尚書乞洞主矣

遊白鹿洞熹得謝字賦
 呈元範伯起之才三
 兄并示諸同遊者

歲月有環周窮臘忽
 受謝眷眷山水心幸
 此朱墨暇招呼得良
 友邂逅成夙駕深尋
 故轍迹喜見新結架
 永懷拾遺公藏器此
 待價橫流詩書澤下
 及楊李霸炎神撫輿
 運制作流大化石室
 萬卷藏綸言九天下
 規模未云遠荒蕪良
 可詫自非賢邑宰誰
 復此精舍會當求敕
 賜畢願老耕稼更與
 盡心期臨流抗風榭

元範尊兄示及十梅詩風格清新意寄深遠吟玩
累日欲和不能昨夕自白鹿玉澗歸偶得數語

江梅

大雪天地閉窮陰渺寒濱誰知江南信已作明年春

嶺梅

梅花破萼時瘴雨吹成雪驛使忽相逢無言似愁絕

野梅

野風吹孤芳迥立正愁絕皂蓋莫徘徊堪看不堪折

早梅

霜風殊未高杖策荒園裏仙子別經年相看共驚喜

寒梅

白玉堂前樹風清月影殘無情三弄笛遙夜不勝寒

小梅

且喜梅花開莫嗟梅花小花小風味深此意君已了

踈梅

玉笛未黃昏冰灘已清淺踈影不勝妍愁心為誰遠

枯梅

樛枝卧龍蛇冷蘂綴冰雪千里故人心今年為誰折

劉平甫折此枝為贈

落梅

花開已淒涼花落更愁寂來歲煙雨時為君和鼎實

賦梅

君欲賦梅花梅花若為賦繞樹百千回句在無言處

觀梅小集以齋禁不得奉陪因寄小詩

梅花年後欲離披恰是先生變食時送與西樓一尊酒諸君莫負可憐枝

元範別後寄惠佳篇清叟次韻見示格律俱高詠歎不置因亦用韻寫呈二兄聊發一笑

故人別我去一月曠音驛今朝得新詩開卷意已適知君到里門征騎聊一息行復敞天閣從容正朝幘自今九霄路不復兩塵隔容與日華東翱翔禁扉北回頭五峰下寂寞笑孤客不賦歸去來心形謾相役

右呈元範

五十行過二雙鬢颯秋草平生素心人誰與共茲抱今年廬山下得子恨不早歲月幸同庚詩書復同道惟應山南北雲母夜堪擣獨生有先期迴崖詎難到丹經不我誑白髮須一掃看公鬚眉蒼杖鉞督征討

右呈清叟

次卜掌書落成白鹿佳句

重營舊館喜初成要共群賢聽鹿鳴三爵何妨奠蘋藻一編詎敢議明誠深源定自閑中得妙用元從樂處生莫問無窮菴外事此心聊與此山盟

白鹿講會次卜丈韻

宮牆蕪沒幾經年祗有寒煙鏤澗泉結屋幸容追舊觀題名未許續遺編

請為洞主不報

青雲白石聊同趣

謂西澗劉公

霽月光

風更別傳

謂濂溪夫子

珍重箇中無限樂諸郎莫苦羨騰騫

再用前韻示諸同遊

幽卧寒巖不記年飽看山月聽風泉舒憂正得琴三疊玩意惟憑易一編誤落塵中垂夙尚却思洞裏付真傳封章倘幸天從欲便解銅符謝繫騫

次韻四十叔父白鹿之作

誅茅結屋想前賢千載遺蹤尚宛然故作軒窓挹蒼翠要
將絃誦答潺湲諸郎有志須精學老子無能但欲眠多少
箇中名教樂莫談空諦莫求仙

送四十叔父

吾家從昔號清門叔父于今道更尊客路艱難空自惜遺
經終始向誰論獨尋雲嶠逢孤姪共愛春江接故園細說
刈葵休放手此來真不爲盤餐

伏蒙秘閣張丈寵顧下邑并以長篇爲貺降歎之
餘牽勉繼韻仰求斤削僭率皇恐

向來滅迹東山東閉門不問烏雌雄門前有路向塵土兩
足未舉心先慵當時亦有車馬客此意欲說嗟誰同窮居

聊復追仲蔚篤論何必須劉龔平生故人子張子相思安
得長相從每勞書疏問生死坐想星宿羅心胷幾年持節
漢水上木牛流馬旌旗紅君王輟饋思頗牧外庸且訖來
朝宗因能過我紫霄下後乘載得珠簾櫳蒼顏白髮應笑
我曷不飽卧陶窓風開樽鴛池水清激下馬醮石烟空濛
須臾路轉山更好摩天巨刃排雙峰少看銀河忽倒掛直
欲跳下清冷中南臨匯澤共指點縹緲貝闕浮珠宮公言
平日愛登覽到此一洗群山空坐間爲我出奇句不用遠
寄南飛鴻上言雲泉足竒賞下歎契闊歡相逢紛吾失脚
墮世網乃有此會寧天窮流光過眼驚昨夢舊約回首羞
塵容明朝却上煙艇去滅沒萬頃追鳧翁

和張彥輔初到南康之句

十年不共賦陽春正有胷中萬斛塵夫喜清詩還入手細
看佳句轉驚人知公近覺青山好顧我頰嗟白髮新肯過
寒齋共尊酒向來心事請深陳

奉同都運直閣張丈哭敬夫張兄張丈有詩敢次
元韻悲悼之極情見乎詞伏幸采覽二首

秀翁威略愴華戎遺恨車書久未同喜有象賢堪嗣事故
知鴻業自無窮蕃宣合奏三年最風采俄驚一旦空根本
平生有深計遺書不但子囊忠

不應世道卽漂淪何事今年失此人禮樂端能懷益友琴
笙忍遽樂嘉賓亦知遊好曾通譜却記登臨喚卜隣兩首

悲詩數行淚感傷那復鬪清新

張丈垂顧適聞訃音爲罷郡宴敬夫向嘗約烹徒居

湖之上蓋相語於裴公臺上云

秘閣張丈簡寂之篇韻高難繼別賦五字以謝來

賦

勞農會稽宅息駕卅元鄉卅元不可見翠壁空雲房是時
中春月暄風發新陽白水注幽壑綠樹敷崇岡俯聽足怡
悅仰觀共徜徉班坐得瑤草傾壺出瓊漿長吟游仙詩亂
以招隱章忽忽林景西躊躇申慨慷坐上江海客兀傲鬚
眉蒼逸氣邁霄漢英詞吐琳琅思與泉石勝韻隨笙鶴翔
追游不敢及咏歎可能忘

俗傳歸宗是王右軍故宅陸修靜封丹元真人

和張彥輔落星寺之作

嵌空竒石戰驚濤樓殿崢嶸勢自高四面真成開玉鑑三
山應是失金鰲題詩正爾難搜句舉酒何妨共作豪倚遍
欄干更愁絕歸來白盡鬢邊毛

和張彥輔白鹿洞之作

邃谷新華館風煙再吐吞舊眠聞野鹿遺恨響礪猿

李拾遺自

此徙居少室乃被徵故有此句

共賞忻同趣分携愴別魂徘徊空日夕無

策駐行軒

次張彥輔西原之作

無處堪投跡空山寄一椽懸門窺絕壁繚徑上層巔檻閣

吞江浪窓虛響谷泉丹經閑自讀不為學神仙

次張彥輔卧龍之作

瀑水源何處高疑雲漢通瀉時垂練直落處古潭空客寄

詩能好龍蟠意自雄知君來峴首為我說隆中

次張彥輔棲賢之作

融冶何年事停杯莫問天祗今從痼疾疇昔似因緣傾耳

真三峽投文沔九淵蘭亭那得此猶足致群賢

和張彥輔雪後棲賢之作

夜來春雪遍林丘却喜風威曉便收好上籃輿閑縱目莫

將衲被苦蒙頭微官正愧逍遙社勝日猶堪汗漫游欲出

林關戀瑤草不妨尊酒更淹留

謝張彥輔留別之作

一別屢更歲思君無已時知君亦念我相望平兩嗟咨我

病卧田間君行護疆陲隱顯既殊跡會合安可期今年定

何年有此一段奇我來五峰陽君歸九江湄聞君肯來辱

歡喜不自持迎君紫霄峰舉觴白鷺池強健初共欣艱棘

旋相悲相顧出危涕薄言首東岐留連十日飲愴恨八哀

詩散懷水石幽遂忘筋力疲雄篇既昂來逸韻方窮追云

胡遽告别牙纛風披披攬袂不得留酌酒前致辭願君騰
此觴去上白玉墀國論罄忠益廟謨參設施一請正紀綱
再請誅羗夷及時樹勲業慰我空山飢時聞張荆州計張
夾有詩哭之故有

八哀
之句

奉答張彥輔戲贈之句

已驅送客車復著登山屐未論窺臨快且脫詩酒厄從今
謹出入保此願正吉不柰歲寒心於公有深意王輔嗣注
願卦大象

云禍從口出
病從口入

奉答張彥輔解嘲

康俗遺居萬疊山高垂鐵鑱詎容攀青鞋布鞵非公事古
木寒泉要我閑

伏蒙某官寵示和陶見寄舊作伏讀歎仰又感知

待期許之意盖非一日率易次韻少見謝臆伏惟
矜憐有以教之

吾公抱經濟軒冕非所欣向來清禁闥本自山林人浩歌
歸去來神交邈何因一朝脫冠去妙境聊同臻謂予雖後
來臭味亦有聞賡詞久見屬重以告語勤荒寒想高風令
人思無鄰甘棠矧在此躑躅晴湖濱

贈于盛二生

昔日豐城劔寒光射斗牛江山餘秀傑人物尚風流二妙
今安匹孤帆各倦游還家問師友折節慕前修

秋日告病齋居奉懷黃子厚劉平父及山間諸兄
友

出山今幾時忽忽歲再秋江湖豈不永我興終悠悠况復

逢旱魃農畝無餘收赤子亦何辜黃屋勞深憂而我忝朝
寄政荒積憊尤懷病卧空閣惻愴增綢繆東南望故山上
有玄煙浮平生采芝侶寂寞今焉儔朝游雲峰巔夕宿寒
巖幽爲我泛瑤瑟冷然發清謳裂牋寄晨風問我君何求
洪濤捩君柁狹硤摧君輶君還若不早無乃非良謀再拜
謝故人低徊更包羞桂華幸未歇去矣從君游

夜坐有感

秋堂天氣清坐久寒露滴幽獨不自憐茲心竟誰識讀書
久已懶理郡更無術獨有憂世心寒燈共蕭瑟

讀諸友游山詩卷不容盡和和首尾兩篇

去年尋得李家山考卜真成屋數間要與青衿時散帙閑
臨碧澗共觀瀾詩書本說人間事勲業休看鏡裏顏誰識

寥寥千古意新詩題罷蘇痕斑

向來結友尋名山下窮絕壑高危顛胡爲一旦墮塵網五
老在望心茫然青牛底處有行迹白鹿幾時同正員清遊
帶雨想幽絕妙處只恐詩中傳

戲贈勝私老友

槐花黃盡不關渠老向功名意自踈乞得山田三百畝青
燈徹夜課農書

勝私先侍講嘗
著農書三卷

代勝私下一轉語

碓下泉鳴溜決渠屋頭桑樹綠扶疎朱虛正自知田事馬
勝何妨讀父書

和戴主簿韻

平生本自好樓居况接高人永晝餘共喜江山入尊俎從

教幕府省文書感君肯出新詩句恨我終思舊草廬擬借
韋編訂龍馬免推納甲話蟾蜍戴嘗有麻衣易說自以爲得之異人云

次沈侍郎游楞伽李氏山房韻

喜陪後騎陟崔嵬竹裏泉鳴古寺開吟罷蘇仙頭白句天
風更送好詩來

天聰已許一言悟年少懸知萬卷開珍重當時讀書處低
回空有後人來

奉同尤延之提舉廬山雜詠十四篇

白鹿洞書院

在郡城東北十五里事見記文

昔人讀書地町疇白鹿場世道有升降茲焉更表章矧今
中興年治具一以張絃歌獨不嗣山水無輝光荒榛適剪
除聖謨已汪洋亦有皇華使肯來登此堂問俗良懇惻懷

賢增慨慷雅歌有餘韻絕學何能忘

折桂院黃雲觀

在書院東北五里院後作亭取李在書院東北五里院後作亭取李

城中東北望五老何蒼蒼下有前朝寺一原頗深藏門前

林澗幽屋後雲木荒閑窓亦明潔著此瑞錦張僧房有更

能理枯筇步上林北岡仰視天宇闊俯瞰江流長即黃雲觀受

書彼何人姓字不足詳竹帛有遺臭桂樹徒芬芳李逢吉嘗讀書

此院去而登第以故得名

楞伽院李氏山房

在折桂西十里李公擇讀書處有東坡記文詩刻枯樹墨跋

躡石循急礧穿林度重岡俛入幽谷邃仰見竒峰蒼李公

英妙年讀書此雲房一去上臺閣致身何慨慷蘇公記藏

書文字有耿光餘事亦騷雅戲墨仍風霜兩公不歸來歲

月忽已荒何用建遺烈寒泉薦孤芳

棲賢院三峽橋

在楞伽西五里

兩岸蒼壁對直下成斗絕一水從中來湧湍知幾折石梁
據其會迎望遠明滅倏至走長蛟捷來翻素雪聲雄萬霹
靂勢倒千嶸嶮足掉不自持竟驚詎堪說老仙有妙句千
古擅竒崛尚想化鶴來乘流弄明月

西澗清淨退菴

在棲賢西三里劉凝之舊隱作亭取黃太史詩語名之

凌兢度三峽窈窕復一原絕壁擁蒼翠奔流逝潺湲聞昔
避世人寄此茅三間壯節未云遠高風杳難攀深尋得遺
墟縛屋臨清灣坐睨寒木杪飛泉閔雲閑茲游非昔游累
解身復閑保此清淨退當不能諼解印後與友生游集徘徊久之

卧龍菴武侯祠

在西三里

空山龍卧處蒼峭神所鑿下有寒潭幽上有明河落我來

憂佳名小築寄幽壑永念千載人丹心豈今昨英姿儼繪
事凜若九原作寒藻薦芳馨飛泉奉明酌公來識此意願
步慘不樂抱膝一長吟神交付冥漠

萬杉寺

在卧龍西十里

休沐聊命駕駕言何所之行尋慶雲寺想像昭陵時門前
杉徑深屋後杉色竒空山歲年晚鬱鬱凌寒姿當年雨露
恩千載有餘滋匠石不敢睨孤標儼相持寺前後杉萬本皆天聖中植有
青禁前更啟石室藏仰瞻天像垂願以清淨化永為太平
代者
基寺藏仁祖御飛白書有清淨字

開先漱玉亭

在萬杉西二里亭舊在橋上今廢

竒哉康山陽雙劍屹對起上有橫飛雲下有瀑布水崩騰
復璀璨佳麗更雄偉勢從三梁外影落明湖裏平生兩仙

句詠嘆深仰止三年落星灣悵望眼空昧今朝隨杖屨得此弄清泚更誦玉虹篇塵襟諒昭洗

簡寂觀

在開先西五里陸修靜所居

高士昔遺世築室蒼崖陰朝真石壇峻煉藥古井深結交五柳翁屢賞無絃琴相携白蓮渚一笑傾夙心晚歲更市朝故山鎖雲岑柴車竟不返鸞鶴空遺音

修靜晚為宋明帝召至建康卒

千崇虛館我來千載餘舊事不可尋四顧但絕壁苦竹寒蕭慘

歸宗寺

在簡寂西十里

金輪紫霄上寶界鸞溪邊往昔王內史願香有餘煙

相傳寺是

王右軍故宅千年今一歸景物還依然澗水既蕩潏山花亦清

妍不辭原隰勞樂此賓從賢訪古共紆鬱勞農獨勤拳憐

我乖勝踐裂牋寄真詮逃禪公勿遽且畢區中緣

是日嘉以事不

得陪杖屨

陶公醉石歸去來館

在歸宗西五里

予生千載後尚友千載前每尋高士傳獨嘆淵明賢及此逢醉石謂言公所眠况復巖壑古縹緲藏風煙仰看喬木陰俯聽橫飛泉景物自清絕優游可忘年結廬倚蒼峭舉觴酌潺湲臨風一長歎亂以歸來篇

温湯

在醉石南二里

連山西南來中斷還崛起干霄幾千仞據地三百里飛峰上靈秀衆壑下清美逮茲勢力窮猶能出奇偉誰燃丹黃燄爨此玉池水客來爭解帶萬劫付一洗當年謝康樂絃絕今已矣水碧復流温相思五湖裏

康樂湖中詩云水碧輟流温豈未見此水

耶也

康王谷水簾

谷口景德觀在温湯西十五里入谷又十五里至簾下

循山西北驚崎嶇幾經丘前行荒蹊斷豁見清溪流一涉
臺殿古再涉川原幽縈紆復屢渡乃得寒巖取飛泉天上
來一落散不收披崖日璀璨噴壑風颼颼追薪爨絕品淪
茗澆窮愁敬酌古陸子何年復來游

陸鴻漸茶經第此水為天下第一

落星寺

在郡城南湖中

浩浩長江水東逝無停波及此一回薄湖平烟浪多孤嶼
屹中川層臺起周阿晨望愛明滅夕遊驚蕩磨極目青冥
茫回瞻碧嵯峨不復車馬迹唯聞榜人歌我願辭世紛茲
焉老漁叢會有滄浪子鳴舷夜相過

閏月十一日月中坐彭蠡門喚船與諸人共載汎

湖至隄首回棹入西灣還分韻賦詩約來晚復集

詩不至者浮以太白

簽判渺教授空知縣望吳學錄枉掌儀明大彭兄蘭判官

擊南公一小彭兄邈彦忠人直卿余公度漿敬直懷衛父天堃流晦翁光泰兒美棹方

解組無多日歸哉喜欲狂臨風成邂逅載月下滄浪酌酒
傳清影鳴橈擊素光它年隔千里此夜莫相忘

和林擇之黃雲之句兼簡同游諸兄

登覽日云晏歸車眇重岡天風振余旗夕露沾我裳數子
情未厭春山杳茫茫還瞻長江白迴眺飛雲黃當念塵中
友心期邈相望無為跨鴻鵠決起凌青蒼

和彭蠡月夜汎舟落星湖

長占烟波弄明月此心久矣從誰說只今一舸漾中流上
下天光兩奇絕回頭忽見西郭門尚喜蘇仙有遺烈問予

何事却回船塵土沈君頭上雪首句全用蘇養直詩蘇舊居水西門外舟行望見其

熹罷官觀康王谷水簾夜飲山月軒分韻得主字
奉別送行諸君

嗟余老不才記憶謝明王昇茲山水郡北邇通玄府一官
再温凉十日九塵土迨茲解章綬絕境方快覩殷勤故人
厚追送崖寺古把酒聽鳴泉相看淚如雨

游天池

三年落星渚北望天池山臨風幾浩嘆欲往無飛翰今朝
復何朝陟此青雲端高尋已竒絕俯瞰何其寬西窮濂溪
原東盡湓城關渺然滄波外淮山碧連環我意殊未極更
思出塵寰何當駕輕鴻八表須臾間視此長江水滔滔儻

西還

觀野燈

飛螢腐草尋常事作底茲山獨耀芒須信地靈資物化金
膏隨處發明光

山北紀行十二章章八句

祇役廬山陽矯首廬山陰雲峰不可覲碧澗何由尋昨朝
解印章結友同窺臨盡彼巖壑勝滿茲仁知心予以閏月

罷郡是夕出城宿羅漢二十八日宿白鹿二十九日登黃雲觀度三峽窺王淵憇西澗飲西原宿卧龍四月一日過開先宿歸宗二日浴湯泉入康王谷觀水簾宿景德觀三日與清江劉清之子澄永嘉張揚卿清叟潯陽王阮南卿周願龜父長樂林用中擇之洛陽趙希漢南紀會稽陳祖永慶長武當祁真卿師忠温陵吳蕪善仲達廬陵許子春景陽新安胡莘尹仲建安王朝春卿長樂余隅占之陳士直彦忠黃榦季直臨淮張彦先致遠會稽僧志南明老俱行窺臨事若何請從圓通說逶迤山門路悄悄修篁列溪

仍侯家名屋是孱王設何救黍離歌喟焉傷覆轍地名侯

溪本侯氏所居李後主取以為寺行逢石門兩解驂寒澗

東朝濟錦繡谷俯仰春冥濛懸泉忽淙琤雜樹紛青紅屢

憇小亭古幽探思無窮石門澗正在天池山下有小菴三

山道錦繡谷再過小橋橋皆竦身長林端策足層崖表仰

瞻空界闊俯歎塵寰小天池西嶽峯佛手東窈窕杖履往

復來憑軒瞰歸鳥盡錦繡谷登山稍高無復林木坡陀而

水不竭東過佛手巖石室嵌空中有井泉僧緣崖斯須暮

雲合白日無餘暉金波從地湧寶燄穿林飛僧言自雄誇

俗駭無因依安知本地靈發見隨天機天池院西數步有

是游人請燈處僧云燈非禱不見是日不禱而光景明滅深尋兩林間清波貫華屋蓮社有遺蹤草堂非

舊築修廊餘故刻好醜雜珉玉亦復記經行深慙後人讀

五日山下山至東西林兩寺相去不百步一溪清駛橫貫其

間皆自方丈前廊廡下過他處所無有也白蓮池在東林

法堂前白公草堂基在寺東久廢近歲復創數椽制殊狹

陋然亦非其正處矣是日題名屬寺僧刻於咸通莊田記

石行軒復東驚祠城當晚遊胡然冠蓋集不盡心期幽夜

厭百谷喧旦失千峰稠出門有遺恨回首空綢繆晚至太

宮唐九天使者祠也江州教授翁名卿載酒肴與山水誠

乃竒云誰究終始曇遠亦何人神君豈其魁東西妄采獲

誣謠共恢詭百世踵謬訛彞倫日頽圯東林慧遠雜取孔

嘗著沙門不敬王者論唐明皇自言親見使者降於殿庭且狂乾坤有真心日月垂休光茫茫宇宙內此柄孰主張

北度石塘橋西訪瀟溪宅喬木無遺株虛堂唯四壁竦瞻

德容睥跪薦寒流碧幸矣有斯人渾淪再開闢平生勞仰止今日登此堂願以圖象意質之巾凡傍先生寂無言賤

子涕泗滂神聽儻不遺惠我思無疆六日拜濂溪先生書堂遺像子澄請為諸

生說太極圖義先生之曾孫正卿彥卿玄孫濤為設食于光風霽月之亭明晨江磯寺尊酒聊

對設孰是十日遊遽成千里別英僚樹嘉政素友厲孤節

努力莫相忘清宵共明月七日薛洪持志王仲傑之才携還軍子澄許張婦廬陵南鄉龜父還家擇

之之湖南予與王余陳黃東度湖口而歸

晦庵先生朱文公文集卷七終

考異

崇壽客舍

月向一作月上

歸未得一作身是客

分韻賦簡寂

迥矚一作俯矚

誰復一作復誰

嶺梅似愁一作但愁

野梅風吹一作風破

愁絕一作幽絕

小梅莫嗟一作莫歎

踈梅不勝一作不成

送四十叔父

獨尋一作獨游

逢孤一作尋孤

秘閣張丈長篇

饋思一作饋念

和張彥輔

失喜一作勝喜

奉同張丈哭敬夫

喚卜一作要卜

和白鹿洞

再吐一作自吐

次棲賢韻

融冶

一作融結

傾耳

一作頹耳

和陶次韻

吾公

一作吳公

棲賢院三峽橋

倏至

一作倏起

長蛟

一作長虹

温湯

據地

一作環地

山北紀行

欽峯

一作嗟峨

孰是

一作云是

晦庵先生朱文公文集卷之八

詩

買船至演平拜建康劉公墓下遂入城假館梅山

堂感涕有作

維舟新曆口步上秣陵阡高丘忽嗟峨宿草迷荒烟拜起
淚再滴哀哉不能言驅車且復東借此虛堂眠念昔堂中
人經營幾何年一旦舍之去千秋不言還露井益清潔風
林更修鮮思公獨不見涕下如奔川感慨西州門愴恨山
陽篇晤嘆日隱樹悲歌月當軒堂堂忠孝心終古諒弗諉
尚與吳門子歸來故山巔

晚雨凉甚偶得小詩請問遊山之日并請劉平父

作主人二首

幾年不踏仙洲路夢入青藤古木間好趁新秋一番雨畫
寒亭下弄潺湲

廬阜歸來祗短筇解包茶茗粗能供若須載酒邀賓客付
與屏山七老翁

宿密菴分韻賦詩得衣字

不到仙洲歲月移携壺特地歎巖扉已驚素雪清人骨更
喜蒼烟染客衣新賞不妨頻徙倚舊題何事獨嗟噉明朝
驛騎黃塵裏莫待迷塗始賦歸

讀子厚步月詩時方聞呂伯恭訃後數日賦此

晚步曲池上西風吹我裳仰觀天宇闊愛此明月光念我
素心人眇焉天一方沒者永垂隔存者爲參商飄零百歲
期寂寞幽鬢霜還坐三太息高林鬱蒼蒼

次子厚秋懷韻

秋風何方來爲我滌殘暑庭梧亦何與索索終夜雨冥思
感物變念此離索苦浩蕩信莫量幽紛那得覩丁年舍我
去憔悴故其所廓落濟時心頽然復安取永懷平生友夢
想見眉宇今晨枉秀句爛若朝霞舉去去同采芝高軒坐
凝佇

黎嶺西南水石佳處不減廬阜戲呈子厚

谷深石瘦水潺潺便是楞伽折桂間珍重下邳圯上客一
年幾度到廬山

讀子厚詩卷用其卒章晨起之韻作詩寄之

晝永倦殘暑宵分喜新涼天雞一振翼爛爛曉月光病榻
感虛徐中庭起翱翔懷哉穀城子物外久不忙掩抑琴調

希激烈歌聲長契闊恨清賞佳期未渠央緘詞託歸鳥側
佇何能忘

登廬峰二首

循礪躋危磴披雲得勝遊蓬茅增舊葺竹樹喜新稠夢想
三秋別徘徊十日留餘年端可料此地欲長休
佳友紛來集欣然會宿心風泉陪徙倚雲月共窺臨雅唱
情俱勝微言思獨深茲遊非逸豫邂逅得良箴

廬峰次韻

澗水流千仞巖姿起萬般扶藜雖有興駐屐諒難安好客
能同趣群峰肯縱觀蒼茫却無際誰與話愁端

次瑞泉詩韻

興懷來賞趣對景却忘言偶與同游客行逢幽澗原淺弘

排積腐暗竇溢流渾終待寒泉食無憂水鏡昏

五禽言和王仲衡尚書

提胡蘆沽美酒春風浩蕩吹花柳不用沙頭雙玉瓶鳥歌
蝶舞爲君壽祇今 醉是君恩昨日之愁愁殺人
不如歸去孤城越絕三春暮故山只在白雲間望極雲深
不知處不如歸去不如歸千仞岡頭一振衣

泥滑滑泥滑滑秦望雲荒鏡湖闊綠秧刺水水拍堤牙旗
畫舸凌風發使君行樂三江頭泥滑水深君莫憂

脫袴脫袴桑葉陰陰墻下路回頭忽憶舍中妻去年已逐
它人去舊袴脫了却不辭新袴知教阿誰做

麥熟吟去年種麥有德音祇今種熟誰快活種者已卧官
墻陰仁公有政惠存歿肯使催租更隳突

酬黃子厚見訪歸途惠詩韻

櫪驥倦千里籠鶴思九臯念昔田舍日不知山林高一朝
逢世紛故丘得潛逃平生棲遁志茲焉始堅牢故人穀城
翁高情北窻陶亦復喜我歸巾車款林巢申旦更離闕中
情重切切

游密菴分韻賦詩得清字

誤落塵中歲序驚歸來猶幸此身輕便將舊友尋山去更
喜新詩取意成暖翠乍看渾欲滴寒流重聽不勝清箇中
有趣無人會琴罷尊空月四更

游密菴得空字

欲覓仙洲路須乘萬里風飲泉雲出岫卧嶺月流空永夜
渾無寐悲歌莫與同起來殘樹影清絕小樓東

昨爲許進之書胎仙字因以名其室或疑欠舞字
者故作此以解之

寒山寒月冷颼颼隻影孤桐萬里遊帝樂夢回三疊遠胎
仙舞罷一簾秋未愁悄寂無人會只恐蹣跚不自休却笑
蕊珠何處所兩忘蝴蝶與莊周

正月五日欲用斜川故事結客載酒過伯休新居
風雨不果二月五日始克踐約坐間以陶公卒章
二十字分韻喜得中字賦呈諸同遊者

玄景彫暮節青陽變暄風忽尋斜川句感此勝日逢駕言
當出遊一寫浩蕩曾雲物疑異候妻迷久連空今朝復何
朝頓覺芳景融疇曩庶復踐隣曲歡來同伊雅一籃輿連
翩數枝筇綠野生遠思清川照衰容遙瞻西山足突兀彌

畝宮庭宇豁清曠林園鬱青葱於焉一逍遙芳樽問鳴桐
既爵日樹隱班荆汀草豐纖鱗動微波新萸冠幽叢惆悵
景易晏徘徊思無窮願書今日懷遠寄柴桑翁仰止固窮
節愧茲百年中

次呂季克東堂九詠

野塘小隱

傳得希夷九卦圖歸來不復夢榮途野塘竟日無人到讀
盡床頭種樹書

敬義堂

高臺巨勝意何如住此知非小丈夫浩氣擴充無內外肯
誇心月夜同孤

方拙寮

一室歸來萬事新窓間橫竹掛朝紳九流未讓園機士四
海寧慙巧宦人

吟哦室

蒲團竹几睡曹騰客問君今幾折肱身世兩忘無可答起
尋詩句遶階行

愛蓮

聞道移根玉井旁開花十丈是尋常月明露冷無人見獨
爲先生引興長

月臺

臺上無人伴苦吟歸鴉過盡日西沉須臾玉匣開塵鏡却
有孤光共此心

菜畦

雨餘菜甲翠光勻
杞菊成畦亦自春
骨相定知非食肉
可
能長伴箇中人

海棠屏

蜀樹成行翠作圍
花開時節更芳菲
主人夢亦尋春去
栩栩深穿錦障飛

橘堤

君家池上幾時栽
千樹玲瓏亦富哉
荷盡菊殘秋欲老
一年佳處眼中來

挽吳給事三首

臺省傾群望江湖去一麾
語聞三諫切政有百年思不盡
雲龍會還尋霧豹期誰知七休詠
翻入八哀詩
粵自辭神武超然絕世紛
前身疏太傅今日范忠文圍樹

寒留月湖波冷浸雲懸知千載下此地想遺芬

憶昔觀風寄登堂識老成忘年見交態把酒話詩情別去
如三歲書來忽九京却思憑檻語忍遽勒公銘

伏讀雲臺壁間秘閣郎中盤谷傳文題詩齒及賤
名追懷曩昔不勝感涕輒次元韻呈諸同遊計亦
同此歎也

提携當日忝忘年曾向瑕丘獨請前喜看玄雲生素壁恍
疑後學廁先賢公遊汗漫今何許我病摧頽久自憐只有
空山無歲月倚天寒木但蒼然

是日景仁景初二兄行視
宅亦宿山間謹并錄呈
尤劇悲
愴耳

次韻寄題萬頃寒光奉呈休齋先生

閑將歲月老煙汀更遣詩情到杳冥
遊子故應悲舊國壯

懷那肯泣新亭一官避世今頭白萬卷收功久汗青但見
潮生與潮落不知沉醉又還醒

熹伏蒙休齋先生惠詩見留謹次高韻二首

忽驚蕭颯鬢毛秋起向泉山覓舊遊盤谷門前淚沾臆雲
臺溪上雪蒙頭歸歟吾黨又千里老矣心期但一丘珍重
休齋書滿屋可無三宿爲君留

望望西山日幾回更憐一雨洗浮埃遠遊莫說雲門寺往
事聊尋單父臺雞犬蕭疎迷洞口交親零落半巖隈尊前
見在君須鬪速上籃輿相逐來

用林擇之韻別陳休齋

別離不覺歲時侵兩地相望共此心今日還成一尊酒它
年應記百篇吟傷情後會無期定握手高情有舊深多謝

曉風知此意不催寒日下疎林

奉酬九日東峰道人溥公見贈之作

幾年回首夢雲關此日重來兩鬢斑點檢梁間新歲月昭
呼臺上舊溪山三生漫說終無據萬法由來本自閑一笑
支郎又相惱新詩不落語言間

和林擇之鳳凰山韻

木落髻鬟擁湖平粧鏡空荒亡餘舊事慘澹只悲風興發
千山裏詩成一笑中諸君莫惆悵吾道固當窮

次林擇之涼峰韻

解轡林間寺歸鴉晚欲盤望中嵐翠合愁外夕陽殘尊酒
何妨盡羈心且自寬無端滿窓月透夜不勝寒

熹去溫陵二十七年而復來顯菴益老見候七里

亭又以佳句見招而休齋陳丈寺丞黃丈皆屬和
焉因次韻奉酬併呈二丈

不因辭吏役那得解天刑故國重來遠寒山依舊青興懷
感陳迹舉自愴新亭尚喜灣頭老禪房許扣扃

答黃叔張

日君趨玉陛抗疏肅邦刑便有榮褒袞無勞滂伏青衆流
爭靡靡一柱獨亭亭只恐追鋒急那容晝揜扃

次韻陳休齋蓮華峰之作

八石天開勢絕攀筭來未似此心頑已吞繚白紫青外依
舊箇中雲夢寬

次黃叔張宿涼峰韻

茵茵含跼天外秀婆娑散影月中孤惜無畫手追前輩寫

就涼峰憇寂圖

至鳳凰山再作

門前寒水青銅闕林外晴峰紫帽孤記得南垞通柳浪依
稀全是輞川圖

見梅用攀字韻

年來羞把玉梅攀萬樹爭春我獨頑只有顛狂無告訴詩
腸欲斷酒腸寬

次韻陳休齋懷古堂

平昔塵編裏心期本自幽那堪舊泉石更作此追游好句
看猶在遺忠愴已休亦知今日意不逐大江流

寄題九日山廓然亭

昨遊九日山散髮巖上石仰看天宇近俯歎塵境窄歸來

今幾時夢想掛蒼壁聞公結茅地恍復記疇昔年隨流水
逝事與浮雲失了知廓然處初不從外得遙憐植杖翁鶴
骨雙眼碧未歎月明中秋風桂花白

用林擇之韻呈陳福公

昔公秉鈞衡金玉我王度中年幾湖海偃息安國步歸然
九鼎重翻若孤雲去俯仰天地間誰哉此同趣

用前韻答方直甫

小儒談大方任意略權度未行要疾走踉蹌不成步唯應
過量人不作與麼去請君敞書帷爲我說歸趣

用前韻答林史君

十年劇傾馳此日際風度胡然龔黃最未接夔龍步詩成
肯遽休客醉那得去却恐驛書來湖山適成趣

題君子亭

清晨坐武觀涼風動高旌挾弓一笑起屈此四座英破的
刃已屢穿楊詎云精軍吏不敢賀高鳥時相驚解鞵脫決
道緩帶飄華纓俯仰新亭幽曠然塵慮清內正外自直三
揖奚所爭端居得深玩君子非虛名

伏承侍即使君垂示所與少傅國公唱酬西湖佳
句謹次高韻聊發一笑

二首

百年地闢有奇功創見猶驚鶴髮翁共喜安車迎國老更
傳佳句走郵童閑來且看潮頭入樂事寧憂酒箴空會見
台星與卿月交光齊照廣寒宮

越王城下水融融此樂從今與衆同蒲眼菱荷方永日轉
頭禾黍便西風湖光盡處天空闊潮信來時海氣通酬唱

不誇風物好一心憂國願年豐

伏承子直都督侍郎臨餞遠郊仍邀嚴州即中及

諸名勝相與燕集分韻賦詩熹得時字輒成鄙句

芳歲修云晏故山風雪時胡爲在中路復此行遲遲爲有
賢主人愛客情依依昨夕西門道終宴不能辭今朝復何
朝祖帳遙相追賓從俱俊賢車馬有光輝敞扉得華觀俯
檻臨清池南州淑氣多蕩節佳景隨雪樹雖改色青山正
含姿朱氏園外谷中有梅近百株是日花落已盡開樽酌春醪授簡哦新詩但
覺四坐驩不知寸晷移流雲暗寒空蒼烟染人衣相看暮
色至我去公當歸別袖不忍分扣扣陳苦詞願公崇令德
慰我渴與饑

臘月九日晚發懷安公父教授壽翁知丞載酒爲

別而元禮景嵩子木擇之廷老考叔舜民諸賢相
與同舟乘便風頃刻數十里江空月明飲酒樂甚
因以星垂平野闊月湧大江流分韻熹得星字醉
中別去乃得數語略紀一時之勝云

掛帆望煙渚整棹別津亭風水已云便我行安得停離樽

枉群賢濁醪愧先傾二公厨船未至先飲舟中餘尊談笑不知遠但覺江

流清江水上流接劍溪潮所不及水益清駛獵獵甘蔗洲茫茫白沙汀斯須

復回首祇有遙山青甘蔗白沙兩地名相去十里頃刻而過野色一以暝川

光晶孤明中流漾華月極浦涵踈星酒酣客散歸茫然獨

霄征起視天宇闊此身一浮萍難追五湖游未願三閭醒

且詠招隱作孤舟轉矜岍

伏蒙制置閣學侍郎示及致政少傅相公送行長

句并得竊窺酬和佳篇伏讀之餘不勝慰幸謹次
高韻少見愚悃以餞車塵伏惟采矚二首

公子威名動海濱四年相與愧情親忽聞黃鉞分全蜀更
祝彤庭列九賓公以上章請對執手便驚成契闊贈言還喜和陽

春政成但祝歸來早別恨無端莫重陳

地蕪梁益盛中權自昔疇咨出萬全定喜封章來活國故
煩伏軾去籌邊公去歲嘗有密疏軍民傳詔歡聲溢婦女

迎門巧笑妍要答君恩與人望可無清教逮初筵諸葛武侯初領

益州牧發教與群下曰夫參署者集衆思廣忠益也若遠
小嫌難相違覆曠損矣違覆而得中猶棄敝蹻而獲珠
玉然人心若不能盡惟徐元直凌茲不惑又董幼宰參署
七年事有不至至于十反來相故告苟能慕元直之十一
而宰之勤渠有忠於國則亮可以少過矣又曰昔初交州
乎屢聞得失後交元直勤見故告前參事於幼宰每言必
盡後從事於偉度數有諫止雖資性鄙暗不能盡納
然與四子終始好合亦足以明其不疑於直言矣

伏讀致政少傅相公送趙成都佳句兩篇不勝慰
幸已次高韻并餞其行而再賦此章以見區區瞻
仰之意繕錄拜呈伏乞采覽二首

歸來寂莫卧漳濱夢想威容阻再親綠野遥聞花欲語赤
書還喜鴈來賓閑中有句人爭誦妙處無心物自春行馬
不因吾輩設胷竒猶得話陳陳

一旦高辭將相權身名從此慶雙全人誇迹已風塵外誰
道心遊日月邊未許前賢專晚節更將餘事發春妍君王
若要詢黃髮便好臨雍促肆筵

送彥集之官瀏陽

急景彫暮節高風振空林病夫掩關卧長謡擁孤衾聞君
千里行四牡方駸駸重此別離感青天欲愁陰君行豈不

勞民瘼亦已深催科處處急椎鑿年年侵君行寬彼昨足
以慰我心薦書會滿篋社酒還同斟所念家同產與君如
瑟琴茲焉不並駕宰木寒蕭慘尚喜吾諸甥男恭女知欽
明朝復相憶悵望楚山岑

次劉正之芙蓉韻三首

淺綠深紅出短籬望中都是可憐枝要看亂颭寒塘水更
待金風滿意吹

凌波直欲渡橫塘却愛無人獨自芳且倚新漪閑照影更
憑女伴一扶將

微吟澤畔幾扶筇自笑摧頽一秃翁羞見芙蓉好顏色且
憑詩律傲西風

晦庵先生朱文公文集卷之八

考典

晚雨凉甚

賓客

一作賓去

付與

一作分付

吟噤室

兩忘

一作相忘

休齋惠詩次韻

忽驚蕭颯

一作還家不覺

老矣

一作老去

珍重

一作見說

三宿

一作三日

遠遊

一作勝游

蕭疎迷

一作荒涼悲

見在

一作有酒

速上

一作好上

逐來

一作趨來

至鳳凰山再作

銅闕

一作銅闕

次韻懷古堂

已休

一作未休

奇題廓然亭

俯歎

一作俯視

周擇之韻呈福公

誰哉

一作懷哉

次韻芙蓉

扶筇

一作杖筇

六十四卦

六十四卦

周禮之入關

對

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...



